

四庫全書

史部

欽定四庫全書

史部

欽定續文獻通考卷二十七

編修

臣

翟槐履勘

總校官內閣中書

臣

孫

溶

欽定四庫全書

欽定續文獻通考卷二十七

市糴考

常平義倉和糴

宋寧宗慶元元年詔戶部右曹專領義倉

是年又以兩浙轉運副使沈誥言比歲不登米價翔
踴凡商販之家發其囤積盡使出糴於是告藏之令
設矣

嘉定八年八月禁州縣遏糴

先是孝宗淳熙七年九月禁諸路遏糴十一年七月以浙西江東水禁諸州遏糴光宗紹熙五年二月禁湖廣江西遏糴至是復有是詔

九年正月罷諸路旱蝗州縣和糴及四川關外科糴

乾道初嘗罷諸路和糴一年李繁知興安府安撫利州東路漢中久饑劍外和糴在州者獨多繁嘗匹馬行阡陌間訪求民瘼有老嫗進曰民所以饑者和糴

病之也泣數行下繫感其言奏免之至淳熙三年廷
臣言四川歲糴軍糧名為和糴實科糴也詔制置使
范成大同繫相度以聞繫奏諸州歲糴六十萬石若
從官糴歲約百萬緡如變科糴為官糴貴賤視時不
使虧毫忽之價出納視量勿務取圭撮之贏則軍不
乏興民不加賦詔如其議盡免蜀中和糴一年民始
知有生之樂會歲大稔米價頓賤父老以為三十年
所無梁洋間繪繫像祠之於是成大奏關外麥熟倍

於常年實由罷糴民力稍紓得以盡於農畝帝覽之
曰免和糴一年田間和氣若此乃知民力不可重困
也十年三月又免四川和糴三年十三年四月再蠲
四川和糴軍糧三年是年復詔罷之

宋史真德秀傳曰嘉定十五年德秀以實謨閣待
制湖南安撫使知潭州罷權酤除斛面米申免和
糴以甦其民民艱食既極力賑贍之復立惠民倉
五萬石使歲出糴又易穀九萬五千石分十二縣

置社倉以徧及鄉落別立慈幼倉立義阡惠政畢
舉月試諸軍射捐其回易之利及官田租凡營中
病者死未葬者孕者嫁娶者贍給有差

理宗寶慶三年詔州縣和糴毋得科抑并申嚴遏糴之
禁

監察御史汪剛中言和糴之弊其來非一日矣欲得
其要而革之非禁科抑不可夫禁科抑莫如增米價
此已試而有驗者也詔所司奉行之又言豐穰之地

穀賤傷農凶歉之地濟糴無策惟以其所有餘濟其所不足則饑者不至於貴糴而農民亦可以得利乞嚴禁遏糴凡兩浙江東西湖南北州縣有米處並聽販鬻流通違者許被害人越訴官按劾吏決配庶令出惟行不致文具從之

立常平收糴黜陟法

侍御史李知孝言郡縣素無蓄積緩急止仰朝廷非法本意曩淮東總領岳珂任江東轉運判官以所

積經常錢糴米五萬石椿留江東九郡以時濟糴諸郡皆蒙其利其後史彌忠知饒州趙彥忱知廣德軍皆自積錢糴米五千石以是推之監司州郡苟能節用愛民即有贏羨若立之規繩加以黜陟所糴至萬石者旌擢其不收糴與擾民及不實者鍰罰庶郡縣趨事蓄積歲增實為經久之利詔行之

宋史袁甫傳曰先是南通判湖州考常平弊原以增積貯核隱產增附嬰兒局尋知徽州請下轉運

常平兩司豫蓄常平義倉備荒興修陂塘創築百梁
繼知衢州歲撥助養士千緡西安龍游常山三邑
積窘豫借為代輸三萬五千緡蠲放四萬五千緡
郡有義莊買良田二百畝益之

又汪綱傳曰綱知蘭溪歲旱郡倚辦勸分綱謂勸
分所以助義倉一切行之非所謂安富恤貧也願
假常平錢為糴本使得循環迭濟及提舉淮東常
平淮米越江有禁綱念淮民有警則室廬莫保歲

凶則轉徙無歸豐年可以少蘇重以苛禁自分畛域豈為民父母意哉請金陵糴三十萬以通淮西之運京口糴五十萬以通淮東之運又言平江積米數百萬陳陳相因久而紅腐宜視其收貯近久取餉輦下百司諸軍中都路倉亦當廣糴以增其數

又高定子傳曰定子知夾江縣會水潦沴饑貧民競愬無所於糴定子曰汝毋憂汝第持錢往常所

糴家以俟廼發縣廩給諸富家俾以時價糴至秋而償須臾米溢於市

又牟子才傳曰子才知太平州郡有平糴倉以米五千石益之又以緡錢二十餘萬創抵庫歲收其息以助糴本

紹定元年賜銀會度牒於湖廣總所令和糴米七十萬石餉軍

自乾道六年四月賜發運使史正志緡錢二百萬為

均輸和糴之用淳熙五年七月以歲豐命沿江糴米百六十萬石以廣邊儲九年正月糴廣南米赴行在紹熙三年正月命夔路轉運使通融漕計糴米以備凶荒至是復有是令

五年許民以米代輸緡錢

臣僚言若將民間合輸緡錢使輸斛斗免令賤糴輸錢在農人亦甚有利此廣糴之良法也從之

嘉熙二年十二月詔諸路和糴給時值平槩量毋得科

抑

先是乾道元年臣僚言江西湖南和糴其弊非一不問家之有無例以稅錢均敷一弊也州縣各以水脚耗折為名收耗米什之二三二弊也公吏斛脚百方乞覓量米則有使用請錢則有糜費三弊也以關引償價許還以輸官及至輸官則不肯受四弊也詔漕臣并提舉往來巡按務盡和糴之意以革四弊如安坐不恤奉行簡慢必罰無赦二年王曦言和糴之弊

朝廷拋降有定數而州縣額外倍科朝廷降糴本於州縣而州縣什不支一二詔令州縣各申嚴條法三年劉珙自汝南召還初入見亦論和糴之弊湖南江西為尤甚謂州縣既乏緡錢將何置場收糴民間關引無用則與白著一同乞詔止之五年臣僚言陛下臨御之初令州縣受納苗米不得多收加耗法禁甚嚴而近年以來所收增多逮和糴時却以出剩之數虛作糴到所得價錢盡資妄用乞申嚴州縣杜絕其

弊以寬民力皆從之至帝紹定四年七月臣僚奏建
劍之間秋霜害稼令諸司措置般運廣米應濟市糴
又言乞嚴飭州縣科糴及人戶投糴不即給錢多取斛
面其州縣折苗並依成法止以下戶畸零減直折錢
違者劾置憲典五年又奏令沿邊和糴高價招誘不
可均數民戶並從之是年復有是詔

湖北安撫使彭龜年乞權住湖北和糴疏曰去年
以淮浙並饑江湖小熟遂下和糴之令嚴遏糴之

禁惠甚渥也然州縣亟欲集事未免敷糴於民商
賈競起趨利又復爭糴於下江淮兩浙司倉以至
總司戎帥皆散遣官吏多齎錢物四處收糴其所
差人爭先趨辦迭增價值以相傾奪米價既長害
及細民細民日添錢糴米富豪愈閉糴自豐遂使
江湖小熟之地反有饑餓不給之民江西湖南皆
病於此湖北愈甚常平米價每石若及兩貫已為
極貴今米直陡添數倍而猶未已况既有補糴又

有和糴數目既多不能頓足其初定價正當秋成
米賤之際只據一時市值每石作一貫五百具申
及後來米直陡貴官司但以事干朝廷只執原價
不敢增添致令百姓受錢於米賤之初而輸米於
增價之後甚者家無見儲不免轉糴以償於官焦
熬如此可不速為之計哉

陳耆卿奏曰臣聞豐歉在天而致其豐歉者在人
制歛之法莫如和糴和糴將以利民而民或以為

害其故何哉夫有粟者之欲錢猶有錢者之欲粟也彼既欲之則惟恐和糴之不行而乃以為害者非其憐於事情蓋由民與民為市此其所樂也民與官為市此其所畏也畏官而復虐於官故寧閉戶以失利毋傾圉以賈害市之價增官之價減一害也市無斛面官有斛面二害也市以一人操槩量無他費焉官之監臨者多誅求無厭三害也市先得錢而官先槩粟有候伺之苦有錢陌不足之

弊四害也四害不去故凶年未有其利而豐年已
罹其擾名雖為和實則強也若果播告有司每遇
收糴必增其價而先予之錢蠲其斛面俾自操槩
量吏有騷動取贏者必寘之罰如是則雖一日萬
斛彼將樂趨之不暇矣裕民實邊二責并塞失今
不圖後將愈難惟裁擇焉

四年九月詔諸路提舉常平司覈所部州縣常平義倉
之儲以備賑濟仍飭制總司今後毋輒移用違者坐之

孝宗隆興二年嘗遣司農少卿陳良弼點檢浙東常
平等倉乾道六年知衢州胡堅奏廣糴常平福建轉
運副使沈樞奏水旱州郡請留轉運使和糴米以續
常平詔即施行八年戶部侍郎楊俟奏義倉在法夏
秋正稅斗輸五合不及斗者免輸凡豐熟縣九分以
上即輸一升令諸路州縣歲收苗米六百餘萬石其
合收義倉米數不少間有灾傷支給不多訪聞諸州
軍皆擅用請稽之淳熙六年帝曰義倉米專備水旱

以濟民今連歲豐稔常平米正當趨時收糴可嚴催
諸路以常平錢盡數糴之七年三省奏去歲豐稔今
歲米賤所在和糴告辦倉廩盈溢其江東路諸郡上
供米初令就近赴金陵鎮江倉今兩處守臣皆云無
可盛貯乞依舊發赴行在豐儲西倉十五年臣僚言
豐儲倉為額一百五十萬石不為不多然積之既久
寧免朽腐乞令戶部相度以每歲諸州合解納行在
米數若干諸處坐倉收糴若干預行會計以俟對兌不

盡之數如常平法許其於陳新未接之時擇其積之
久者盡數出糶俟秋成日盡數補糶則是五十萬石
之額永無銷耗此亦廣儲蓄之策也從之光宗紹熙
二年正月命兩淮行義倉法寧宗時黃疇若為殿中
侍御史乞撥買官田充糶本以廣常平之儲趙必愿
知崇安縣舊有均惠倉無所儲必愿捐緡錢增糶至
二千石迨知泉州秋旱力講行荒政乞撥永儲廣儲
二倉米賑救之又知婺州措置廣惠倉及諸倉積穀

至帝紹定元年資政殿學士曾從龍知潭州奏州縣賑民之法有三曰濟曰貸曰糶濟不可常惟貸與糶為可久今撥緡錢一千萬有奇分下潭州十縣委令佐糶米置惠民倉乞比附常平法從之其弟用虎知興化軍事立平糶倉捐楮幣萬六千緡為糶本益以廢寺之穀歲歉價高則發倉以糶之歲豐價平則散諸寺易新穀藏焉又其時常林辟差平江府百萬倉檢察不受和糶事例戢吏卒苛取六年二月臣僚言

義倉為官吏蠹耗帝曰此自是民戶寄留於官專為水旱之備務令覺察至是以江湖浙東建劍汀卽旱傷故有是詔從右諫議大夫徐榮叟請也

淳祐三年八月詔申嚴郡縣社倉科配之禁

初孝宗淳熙八年浙東提舉朱熹言乾道四年民艱食請於府得常平米六百石賑貸夏則受粟冬則加息隨年斂散斂則蠲息之半大饑則盡蠲之凡十有四年得息米造倉三間還府元數見儲米三千一百

石以為社會不復收息每石只收耗米三升雖遇凶
年人不闕食請以是行於倉司時陸九淵在勅令局
歎曰社倉幾年矣有司不復舉行所以遠方無知者
十二月遂下其法於天下嘉定末真德秀帥長沙行
之凶年饑歲人多賴之然事久而弊或移用而無可
給或拘催無異正賦良法美意胥此焉失至是又申
嚴科配之禁其後黃燾添差江西運司幹辦公事念
社倉之置僅貸有田之家而力田之農不得沾惠遂

倡議裒穀創社倉以貸佃人趙景緯知台州建黃巖縣社倉至六十有六又廣德軍官置社倉民困於納息至以息為本而息皆橫取民窮至自經人以為朱子之法不敢議黃震為通判曰是不然法出於堯舜三代聖人猶有變通安有先儒為法不思救其弊耶况朱子之法社倉歸於民而官不與官雖不與而終有納息之患乃為別買田六百畝以其租代社倉息約非凶年不貸而貸者不取息焉

十年七月復申和糴害民諸禁

諭輔臣和糴本非朝廷之得已若官司奉行無擾則人戶自樂與官為市訪聞近年所在和糴未得朝廷拋降豫行多敷富室大家臨期卒以賂免而中產下戶反被均敷之害以至散錢則吏胥減剋納米則斛面取贏專計誅求費用尤夥民間所得糴本每石幾耗其半其何以堪可申嚴約束

宋史葉夢鼎傳曰淳祐六年夢鼎知袁州轉運司

和糴米三萬斛夢鼎言泰山多而田少朝廷免和
糴已百年自今開之百姓子孫受無窮之害則無
窮之怨從之

又趙汝愚傳曰趙崇憲知江州郡民歲苦和糴崇
憲疏於朝永蠲之且轉糴旁郡穀別廩貯之以備
歲儉

又張處傳曰處知南康轉運使以錢萬二千緡置
平糴於郡處復出錢萬二千緡以增益之民賴其

利

開慶元年命諸路並視時以一色會子糴米以供軍餉
沿江制置司招糴米五十萬石湖南安撫司五十萬
石兩浙轉運司五十萬石淮浙發運司二百萬石江
東提舉司三十萬石江西轉運司五十萬石湖南轉
運司二十萬石太平州一十萬石淮安州三十萬石
高郵軍五十萬石漣水軍一十萬石廬州一十萬石
景定元年九月赦諸路義米賠納錢

赦曰諸路已糶義米價錢州郡以低價抑令上戶補
糶正稅逃閤義米受虧常平司責縣道賠納縣道遂
敷吏貼保正常攬戶等人均納自今視時收糶見繫
吏貼等人賠納之錢並與除放至五年監察御史程
元岳奏隨杭帶義法也今杭糯帶義之外又有所謂
外義焉者絹紬豆也豈有絹紬豆而可加之義乎縱
使違法加義則絹加絹紬加紬豆加豆猶可言也州
縣一意推剝一切理苗而加一分之義甚者赦恩已

蠲二稅義米依舊追索貧民下戶所欠不過升合星火追呼費用不知幾百倍破家產鬻妻子怨嗟之聲有不忍聞望嚴督監司止許以杭帶義其餘盡罷其有循習病民者重其罰從之

是年詔臨安府收糴米四十萬石

初臨安府平糴倉貯米數十萬石糴補循環其後用而不補所存無幾至是用平糴倉錢及封樁庫十七界會子收糴四十萬石

二年以都城全仰浙西米斛誘人入京販糴其賞格比乾道七年加優

命和糴魚科御前莊米

帝曰遞年和糴止及民戶今歲水潦凡御前莊米亦照民間所科之數輸之有司以示上下一體之意

度宗咸淳八年六月以錢千萬命京湖制司糴米百萬石轉輸襄陽府積貯又以錢五百萬緡命四川制司詣湖北糴運上峽入夔米五十萬石

九年命交納和糴選清強正佐等官

臣僚言州縣交量科糴之弊乞令下江西湖南運司各遴選諸郡清強正佐幕職等官互往鄰郡交納和糴不許差右選及權豪等貪謬之人充應仍各遍牒本路州軍守倅毋使奸吏生事淹滯所委之官如有違戾從御史臺覺察聞奏

恭帝德祐元年七月令權糴公田今年租每石以錢十貫給田主十貫給種戶其鎮江常州江陰被兵者勿糴

又糴浙西邸第寺觀田米十之三

遼聖宗統和十三年十月詔諸道置義倉

歲秋社民隨所獲戶出粟庠倉社司籍其目歲儉發以賑民

十五年三月詔免南京舊欠義倉粟

道宗大安九年十月詔廣積貯以備水旱

臣等謹案遼史食貨志道宗時東京如咸信蘇復辰海同銀烏遂春泰等五十餘城內沿邊諸州各

有和糴倉依祖宗法出陳易新許民自願借貸收
息二分所在無慮二三十萬石雖累兵興未嘗用
乏迨天祚帝天慶間金兵大入盡為所有會帝播
遷耶律迪里等逼立梁王雅里令羣牧人戶運鹽
糶倉粟人戶侵耗議籍其產以償雅里自定其直
粟一車償一羊三車一牛五車一馬八車一駝從
者曰今一羊易粟二斗尚不可得乃償一車此直
太輕雅里曰民有則我有若令盡償民何以堪雖

其時土崩瓦解事已不可為然使天未絕遼斯言
未始不足以彰君惠而收人心而非所望於雅里
之乘亂竊立名不正言不順事不成者也

金熙宗皇統二年十月燕西東京河東河北山東汴京
等路秋熟命有司增價和糴

世宗大定二年遣官和糴於山東

帝以正隆之後倉廩久匱遣太子少師完顏守道等
山東東西路收糴軍糧除戶口歲食外盡令納官給

其直至三年謂宰臣曰國家經費甚大向令山東和糴止得四十五萬餘石未足為備自古有水旱所以無患者由蓄積多也山東軍屯處須急為二年之儲若遇水旱則用賑濟自餘宿兵之郡亦須糴以足之京師之用甚大所須之儲其勅戶部宜急為計

六年八月命諸路廣糴以備水旱

先是帝嘗責宰臣曰朕謂積貯為國本當修倉廩以廣和糴今聞外路官文具而已卿等不留心甚不稱

委任之意至是乃勅有司秋成之後可於諸路廣糴以備水旱至十二年十二月又申此詔

九年正月詔諸州縣和糴毋得抑配百姓

諭宰臣曰朕觀宋人虛誕恐不能久遵誓約其令將臣謹飭邊備以戒不虞去歲河南豐宜令所在廣糴以實倉廩并毋許抑配

十二年十二月詔在都和糴以實倉廩且使錢幣流通自十年十月帝以官錢不得流通責戶部官又謂隨

處時有賑濟往往近地無糧取於他處往返既遠人愈難之何為不隨處起倉年豐則多糴以備賑濟設有緩急亦豈不易辦乎而徒使錢充府庫將安用之至是遂有是詔

十四年詔定常平倉制中外行之

十六年五月以西邊自來不備儲蓄諭右丞相赫舍哩良弼令所在和糴以備緩急

十七年四月命東京等路賑濟就鄰道增直以糴

先是尚書省奏先奉詔賑濟東京等路饑民三路粟數不能給帝曰朕嘗諭卿等豐年廣糴以備凶歉皆言天下倉廩盈溢今欲賑濟乃云不給自古帝王皆以蓄積為國長計朕之積粟豈欲獨用即令不給可於鄰道取之自今多備當以為常至是尚書省奏東京三路十二明安尤闕食者已賑之矣尚有未賑者詔遣官詣復州哈斯罕路檢視富家蓄積有餘增直以糴令近地居民就徃受糧

十八年四月命泰州所管諸明安西北路招討司所管明安威平府慶雲縣霧鬆河等處遇豐年多和糴

章宗明昌元年八月復設常平倉

自大定十四年行常平倉其法尋廢至是御史請復設勅省臣詳議以聞省臣言大定舊制豐年則增市價十之二以糴儉歲則減市價十之一以出平歲則已夫所以豐則增價以收者恐物賤傷農儉則減價以出者恐物貴傷民增之減之以平粟價故謂常平

非謂使天下之民專仰給於此也。今天下生齒至衆，如欲計口使餘一年之儲，則不惟數多難辦，又慮出不以時而致腐敗也。況復有司抑配之弊，殊非經久之計。如計諸郡縣驗戶口例，以月支三斗為率，每口但儲三月已及千萬數，亦足以平物價救荒凶矣。若令諸處自官兵三年食外可充三月之食者，免糴其不及者，俟豐年糴之，庶可久行也。然立法之始，貴在必行。其令提刑司各路計司兼領之郡縣吏沮格者，

糾能推行者加擢用若中都路年穀不熟之所則依
常平法減其價三之一以糴詔從之

三年八月勅以常平倉豐糴儉糴有司奉行勤惰褒罰
之制徧諭諸路其奉行減裂者提刑司糾察以聞

又謂宰臣曰隨處常平倉往往有名無實況遠縣人
戶豈肯跋涉直就州府糴糴可各縣置倉命州府縣
官兼提控管勾遂定制縣距州六十里內就州倉六
十里外則特置舊擬備戶口三月之糧恐數多致損

改令戶二萬以上備三萬石一萬以上備二萬石一萬以下五千以上備萬五千石五千戶以下備五千石河南陝西屯軍儲糧之縣不在是數州縣有倉仍舊否則創置郡縣吏受代所糴粟無壞一月內交割給由如無同管勾亦准上交割違限委州縣并提刑司差官催督監交本處歲豐而收糴不及一分者本等內降提刑司體察直申尚書省至日斟酌黜陟十月勅置常平倉之地令州府官提舉之縣官兼董其

事以所糴多寡酌量升降為永制

命上京置常平倉

諭尚書省曰上京路諸縣未有常平倉如亦可置定其當備粟數以聞

四年七月詔凡官糴俟秋收日依常平例收糴

諭戶部曰聞通州米粟甚賤若以平價官糴之如何有司奏中都路去歲不熟今其價稍減者以商旅運販繼至故也若即差官爭糴恐市價騰踴貧民愈病

請俟秋收日依常平倉條理收糴詔從之

九月詔權罷常平倉和糴

尚書省奏明昌三年始設常平倉定其永制天下常
平倉總五百一十九處見積粟三千七百八十六萬
三千餘石可備官兵五年之食米八百一十餘萬石
可備四年之用而見在錢總三千三百四十三萬貫
有奇僅支二年以上見錢既多且比年稍豐而米價
猶貴若復豫糴恐價騰踴於民未便遂詔權罷中外

常平倉和糴俟官錢羨餘日舉行

十月罷上京常倉

尚書省奏今上京扶餘率賓哈喇呼爾罕等路明安
穆昆民戶計一十七萬六千有餘每歲收稅粟二十
萬五千餘石所支者六萬六千餘石總其見數二百
四十七萬六千餘石臣等以為此地收多支少遇災
足以賑濟常平倉似不必置遂止

金史馮璧傳曰章宗承安中璧調遼濱主簿縣有

和糴粟未給價者餘十萬斛散貯民居以富人掌之有腐敗則責償於民民殊苦之壁白漕司即日罷之民大悅

宣宗貞祐三年八月定沿河遮糴法取其八以抑販米之弊仍嚴禁私渡

至四年四月河北行省侯摯言比商販粟渡河官遮糴其什八商遂不行民饑益甚請罷其令從之又制凡軍民客旅粟不於官糴處糴而私販渡河者杖一

百沿河軍及譏察權豪家犯者徒年杖數並的決從
重以物沒官

金史侯摯傳曰貞祐四年河北大饑摯上言今河
朔饑甚人至相食觀滄等州斗米銀十餘兩殍殣
相屬伏見沿河上下許販粟北渡然每石官糴其
八彼商人非有濟物之心也所以涉河往來者特
利其厚息而已利既無有誰復為之是雖有濟物
之名而實無所渡之物其與不渡何異昔春秋列

國各列疆界然晉饑則秦輸之粟及秦饑晉閉之
糴千古譏之況今天下一家河朔之民皆陛下赤
子而遭罹兵革尤為可哀其忍坐視其死而不救
歟人心惟危臣恐弄兵之徒得以藉口而起也願
止其糴縱民輸販為便詔尚書省行之

十月命尚書右丞高汝礪糴於河南諸郡

時令民輸輓入京後命在京諸倉糴民輸之餘粟侍
御史洪果納紳言汝礪所糴足給歲支民既於租賦

之外轉輓而來亦已勞矣止將其餘以為歸貲而又
強取之可乎且糴此有日矣而止得三百餘石此何
濟也詔罷之

十二月議禁京師穀出境不行

時行貞祐寶券帝以附近郡縣多糴於京師穀價騰
踴乃令尚書省集戶部講議所開封府轉運司議所
以制之者戶部及講議所言以五斗出城者可闡糴
其半轉運司謂宜悉禁其出開封府謂寶券初行時

民甚重之但以河北陝西諸路所支既多人遂輕之
商賈爭收入京以市金銀金銀價昂穀亦隨之若令
寶券路各殊制則不可復入河南河南金銀賤則穀
自輕若直閉京城粟不出則外亦自守不復入京穀
當益貴宜諭郡縣小民無妄增價官為定制務從其
便帝從開封府議

四年復行遮糴法并命豐稔之日增價和糴

帝以河北州府錢多其散失民間頗廣命尚書省措

畫之省臣奏已命山東河北權酷及濱滄鹽司以分
數帶納矣今河北艱食販粟北渡者衆宜權立法以
遮糴之擬於諸渡口南岸選通練財貨官先以金銀
絲絹等博易商販之糧轉之北岸以回易糴本兼收
見錢不惟杜奸弊亦使錢入京師從之又上封事者
言比年以來屢艱食雖由調度征斂之繁亦兼并之
家有以奪之也收則乘賤多糴困急則以貸人私立
券質名為無利而實數倍饑民惟恐不得莫敢較者

故場功甫畢官租未了而國已空矣此富者益富而
貧者益貧也國朝立法舉財物者月利不過三分積
久至倍則止今或不期月而息三倍願明勅有司舉
行舊法豐熟之日增價和糴則在公有益而私無損
矣詔宰臣行之

興定元年以和糴大重百姓棄業者多命宰臣加意體
察

六月立和糴賞格

八月權陝西行六部尚書楊貞奏糴販糧濟河者之半以寬民從之

哀宗天興二年八月蔡州設四隅和糴官

時帝在蔡州故僅於城四

隅設之

元世祖中統二年九月置和糴所於開平以戶部郎中宋紹祖為提舉和糴官

始以鈔一千二百錠於上都北京西京等處糴三萬石四年三月又命扎瑪拉曷糴糧仍勅軍民官毋沮

五年諭北京西京等路市糴軍糧至元元年正月勅
北京西京宣慰司隆興總管府和糴以備糧餉三年
於南京等處和糴四十萬石七年三月尚書省言河
西和糴應僧人豪官富民一例行之制可八年二月
勅往輝和爾地市粟萬石又驗各處糧粟價值增十
分之一和糴三十九萬四千六百六十石

元史食貨志曰和糴之名有二曰市糴糧曰鹽折
草率皆增其直而市於民於是邊庭之兵不乏食

京師之馬不乏芻而民亦用以不困

四年以解鹽引一萬五千道和中陝西軍儲

至至元四年命沔州等處中納官糧續還其直十六
年以兩淮鹽引五萬道募客旅中糧二十一年以河
間山東兩浙兩淮鹽引募諸人中糧是年九月又發
鹽引七萬道鈔三萬錠於上都和糴二十四年官發
鹽引聽民中糧至順帝至正三年平章政事特穆爾
達實言嶺北地寒不任穡事歲募富民和糴為邊餉

民雖稍利而費官鹽為多請別輸京倉米百萬斛儲於和林以為備從之

至元六年始立常平義倉法

常平倉法豐年米賤官為增價糴之歉年米貴官為減價糶之八年以和糴糧及諸河倉所撥糧貯之二十一年十月又立常平倉以五十萬石價鈔給之二十三年定鐵法又以鐵課糶糧充焉義倉法社置一倉以社長主之豐年每親丁納粟五斗驅丁二斗無

粟聽納雜色歟歲就給社民二十一年新城縣水二十九年東平等處饑皆發義倉賑之

元史馬亨傳曰至元三年亨為戶部尚書建言立常平義倉謂備荒之舉宜亟舉行而時以財用不足止設義倉

又姦臣傳曰至元二十二年右丞盧世榮奏國家雖有常平倉實無所蓄臣將不費一錢但盡禁權勢所擅產鐵之所官立鑪鼓鑄為器鬻之以所得

利合常平鹽課糴粟積於倉待貴時糴之必能使
物價恒賤而獲厚利國家雖立平準然無曉規運
者以致鈔法虛弊諸物踴貴宜令各路立平準周
急庫輕其月息以貸貧民如此則貸者衆而本且
不失矣

十三年置應昌和糴所

十五年六月置甘州和糴提舉司以備給軍餉賑貧民
至十九年九月又命和糴於隆興德興府宣德州糧

九萬石二十年正月以征日本發鈔三千錠糴糧於
察罕諾爾以給軍匠又命諸軍習舟楫給鈔八千錠
於隆興宣德等處和糴以贍之十二月給鈔四萬錠
和糴於上都食貨志是年以鈔五千錠市於北京六
萬錠市於上都二千錠市於應昌與紀
二十一年四月以鈔四千錠於應昌市糴九月發
鹽引七萬道鈔三萬錠於上都和糴二十二年以鈔
五萬錠令茂巴爾斯和糴於上都是年二月詔江南
民田秋成官為定例收糴次年減價出糴十月以鈔

五千錠和糴於應昌府二十三年發鈔五千錠市糴沙靜隆興軍糧二十四年十二月以揚州杭州鹽引五十萬道兌換民糧二十五年四月僧格言自至元丙子置應昌和糴所其間必多盜詐宜加鈎考從之二十七年和糴西京糧其價每一十兩之上增一兩成宗大德元年三月遣阿里以鈔八萬錠糴糧於和林至武宗至大元年十月以大都糶食糴米十萬石減價賑之以其鈔和糴於江南十一月尚書省言竊計

國之糧儲歲費寢廣而所入不足今歲江南頗熟欲遣使和糴恐米價暴增請以至大鈔二千錠分之江浙河南江西湖廣四省於來歲諸色應支糧者視時直予以鈔可得百萬不給則聽以各省錢足之制可武宗至大二年九月隨處路府州縣設立常平倉以權物價

豐年收糴粟麥米穀俟青黃不接之時比附時估減價出糴以遏沸湧十月御史臺言常平倉本以益民

然歲不登遽立之必反害民罷之便命與省臣議之
仁宗延祐三年中糴和林糧二十三萬石

其後五年六月又各和中二十萬石

四年二月勅郡縣各社復置義倉

自至元六年立義倉後至末年各社倉多空乏東平
趙天麟常論之皇慶二年帝復申其令然亦皆名存
實亡至是乃勅郡縣復置義倉

趙天麟上策曰隋開皇五年長孫平令軍民當社

共立義倉至元六年亦每社立一義倉自是以來
二十餘年矣然社倉多有空乏之處頃來水旱相
仍蝗螟蔽天饑饉薦臻四方迭苦轉互就食老弱
不能遠移而殍者衆矣彼隋立義倉而富今立義
倉而貧豈今民不及隋民哉臣試陳之蓋計丁納
粟之過也伏望普頒明詔詳諭農民凡一社立社
長社司各一人社下諸家共穿築倉窖一所為義
倉凡子粒成熟之時納則計田產頃畝之多寡而

聚之凡納例常平每畝粟率一升稻率二升凡大
有年聽自相勸督而增數納之凡水旱蝗螟聽自
相免凡同社豐歉不均宜免其歉者所當納之數
凡饑饉不得已之時則計口數之多寡而散之凡
出例每口日一升儲多則每口日二升勒為定體
凡社長社司掌管義倉不得私用凡官司不得拘
檢借貸及許納雜色皆有前詔在焉如是則非惟
共相賑救而義風亦行矣

泰定帝泰定二年九月以郡縣饑詔運粟十五萬石貯
潁河諸倉以備賑救仍勅有司治義倉

至四年正月燕南廉訪司請立真定常平倉不報
文宗至順二年十月命和糴於通漕陵滄等處

中書省言江浙平江湖州等路水傷稼明年海漕米
二百六十萬石恐不足宜令運百九十萬而命河南
發三十萬江西發十萬又遣官齎鈔十萬錠鹽引三
萬五千道於通漕陵滄四州優價和糴米三十萬又

以鈔二萬五千錠鹽引萬五千道於通滬二州和糴
粟豆十五萬石鈔三十萬錠往遼陽懿錦二州和糴
粟豆十萬石並從之

順帝至元元年十一月以改元詔立常平倉

至正七年分海漕米四十萬石置沿河諸倉以備凶荒
至十五年江浙省臣言至正十五年稅課等鈔內除
詔書已成稅糧等鈔較之年例海運糧并所支鈔不
敷乞減海運以甦民力戶部定例本年稅糧除免之

外其寺觀并撥賜田糧十月開倉盡行拘收其不敷糧撥至元折中統鈔一百五十萬錠於產米處糴一百五十萬石貯瀕河之倉以聽撥運從之

元史太平傳曰至正二年中書左丞太平以粟貴而金銀賤請出官本委官收市之所得不貲其後兵興卒獲其用

又伊嚕布哈傳曰至正五年伊嚕布哈除吏部員外郎奉命至江浙糴粟二十四萬石至則第戶產

之高下以為糴之多寡民不擾而事集既而軍餉不給又奉命出糴於江浙召父老諭之曰今天子宵衣旰食惟恐澤不下民而民不得其所耳然奈盜賊何夫討賊者必先糧餉以我不汝擾故命我復來蓋討賊即所以安民耳父老其謂何衆咸應曰公言是也不踰月糧事以畢

又貢師泰傳曰至正十四年江淮兵起京師食不足命吏部侍郎貢師泰和糴於浙右得糧百萬石

以給京師五十年除戶部尚書俾分部閩中以閩
鹽易糧由海道轉運給京師凡為糧數十萬石朝
廷賴焉

明太祖洪武初設預備倉

朝廷出楮幣詔行省各選耆民運鈔糴糧儲之鄉村
以備賑濟即令掌之其後州縣充積而糴猶未已至
二十四年八月帝恐者民緣此以病民乃罷耆民糴
糧

二十二年三月命遣官運鈔市糴以備賑

詔戶部遣官運鈔往河南山東北平山西陝西五行
省俟夏秋粟麥收成則於鄉村輻輳之處市糴儲之
以備歲荒賑濟

大學衍義補曰天生萬物惟穀於人為最急而不
可一日無者乃農民無遠慮一遇豐收視如土芥
變穀以為錢又變錢以為服食日用曾未幾時隨
即罄盡不幸有荒年則伐桑棗賣子女流離失所

凡草茅木皮無不食者是在舉李愷平糶之法各
立常平司每司注戶部屬官三員量地大小借與
官錢為本歲臨所分屬縣親驗麥熟幾分粟熟幾
分與夫大小豆之類皆定分數申部而因種類之
豐荒隨時價之多少收糶在官不分是何米穀逐
月驗地之所收市之所售粟少則發粟麥少則發
麥諸穀俱不收然後盡發之

若易朽腐者又
在臨時斟酌隨處

立倉通融般運分散量時取直凡貨物可用者皆

售之不必專取銀錢所得貨物可資國用者具數
送官其餘聽從隨時變賣以為糴本使農與人兩
不傷豐與歉兩俱足亦養民足食之一助也

成祖永樂中令天下府州縣多設倉儲移置預備倉於
城內

先是洪武三年建臨濠臨清二倉以供轉運各州縣
設預備倉東西南北四所以賑凶荒二十四年儲糧
十六萬石於臨清以給訓練騎兵至是預備倉在四

鄉者移置城內迨會通河成始設倉於徐州淮安德州而臨清因洪武之舊并天津倉凡五會之水次倉皆以資轉運

仁宗洪熙元年六月

時宣宗初即位

勅申明預備倉舊制

帝諭尚書夏原吉等曰預備倉儲正為百姓比之前代常平最為良法若處處儲積完備雖有水旱災傷百姓可無饑窘此太祖皇帝良法美意宜徧行天下申明舊典務存實惠勿事虛文

宣宗宣德二年正月令泰安州民所借預備倉糧聽家業成後償官

山東泰安州奏永樂十七年十八年人民艱食於預備倉借糧二萬一千三百石賑之洪熙元年秋成止償四千餘石多因逃徙復業欲待年業悉得償官帝諭戶部曰逃民初復且當優恤常慮有司不體人情今所奏良協朕心其聽家業已成後年穀有收則令償官

三年四月命遣官巡視郡縣預備倉有慢令及欺弊者罪之

給事中宋徵言洪武中所羅郡縣預備倉穀歲歉則散秋熟則還數年來有司官吏與守倉之民或假為已有或私貸與人俱不還官倉廩頽廢宜令郡縣修倉徵收以備荒歉帝諭戶部曰此備荒良策廢弛如此皆有司之過即遣官巡視整理之

四年六月復議行置倉積粟預備法

吏部聽選官歐陽齊言洪武中於各州縣置倉積粟
今各倉多廢一遇荒歉民無所望乞令府縣如舊修
理倉厰原有儲糧給散未還者悉徵還官其民戶繁
而積粟少者豐年令所司支官錢於有穀之家平糴
收貯庶凶歲無虞小民有賴命議行之河南布政司
叅議邢旭亦奏洪武中直隸安慶等府宿松等縣四
鄉俱有預備倉糧今河南州縣俱無之帝下部議部
言宜令各處州縣未設倉者皆設如例或於今歲稅

糧內存留或秋成支官錢平糴帝曰此固善策須俟
年豐行之五年五月僉都御史李濬亦以河南山西
向有預備倉儲乞如法修倉收糴從之七年五月巡
撫湖廣御史朱鑑言洪武間各府州縣皆置東西南
北四倉以貯官穀遇有水旱饑饉以貸貧民民受其
惠今各處有司以為不急之務倉廩弛穀散不收
乞令府州縣備倉廩謹儲積給貸以時徵收有實仍
令布按巡按等巡察違者罪之帝諭戶部曰此祖宗

良法美意此由守令不得人遂致廢弛言者比比而未有興復之者爾部亦豈能無過其有違者從按察司監察御史劾奏

英宗正統元年七月命所在有司增設社倉

順天府推官徐郁言建立義倉本以濟民然一縣止一二所民居星散賑接之際追呼拘集動淹旬月不免餓殍乞令所在有司增設社倉仍取宋儒朱熹之法叅酌時宜定為規畫以時斂散庶凶荒有備而無

二十
惠帝以其言甚切命有司速行之

二年五月令江浙豐收處斂糴以備荒賑

戶部奏洪武中各府縣俱設預備倉糧隨時散斂以濟貧民實為良法近歲有司視為泛常倉廩頽塌而不葺糧米逋負而不徵歲凶缺食往往借貸於官令江浙諸處豐收請令所司出價斂糴以備荒賑從之
三年四月巡撫河南山西侍郎于謙奏請於本年起運萬全等衛糧料內改撥六萬石赴大同府倉收納備用

從之

謙巡撫河南山西小有水旱輒上聞至六年疏言河南山西積穀各數百萬請以每歲三月令府州縣報缺食下戶隨分支給先菽秫次黍麥次稻俟秋成償官而免其老疾及貧不能償者州縣吏秩滿當遷預備糧有未足不聽離任仍令風憲官以時稽察詔行之

食貨志曰太祖時天下州縣多所儲蓄後漸廢弛

惟于謙撫河南山西修其政周忱撫南畿別立濟
農倉他人不能也

四年十月遣廉幹京官往督州縣平糴以舉廢為殿最
大舉士楊士奇言太祖篤意養民備荒有制天下郡
縣悉出官鈔糴穀貯倉以時散斂歲久弊滋豪猾侵
漁穀盡倉毀稍遇凶荒民無所賴請擇遣京官廉幹
者往督有司凡豐稔州縣各出庫銀平糴儲以備荒
即以舉廢為殿最風憲官各務稽考欺蔽怠廢者具

奏罪之庶官有備荒之積民無旱潦之虞仁政所施
莫切於此帝曰此祖宗良法美意命戶部速行之五
年正月令六部都察院推選屬官領勅分詣兩畿各
省府州縣立預備倉發所在庫銀糴糧貯之軍民中
有能出粟以佐官者授以散官旌其門

十一月命查北直隸各府州縣散過預備倉糧及官降
糴糧折鈔數俟秋成令有司照舊修置倉廩收積糧儲
以備賑貸

從大理寺少卿李畛彥言也

食貨志曰正統時重預備倉侵盜之罪至僉妻充軍且定納穀千五百石者獎為義民免本戶雜役凡賑錢米一石俟有年納插穀二石五斗還官

景帝景泰三年二月募軍民運米納開原鐵嶺倉

都御史王翱奏開原鐵嶺急缺倉儲請募軍民於遼東運米千石赴開原海州運米千石赴鐵嶺俱冠帶崇身從之三月命廣西巡撫李崇榜諭軍民有出米

自五百石至一千五百石納倉者給冠帶及授官職有差

憲宗成化元年四月改設德州臨清縣預備倉於城內先是二處預備倉各置於城外官私難於出納至是從有司奏城內各有空厰請即以為倉儲預備糧而名臨清曰常盈德州曰常豐設官主其事

二年八月以各處折糧銀四萬兩命官平糴米粟以實臨清德州水次倉

從戶部請也時給事中邱弘又言山東疊報歲歉宜將淮安府庫賑濟銀四萬兩內撥二萬兩分遣公正官召商糴米於臨清濟寧德州及鳳陽淮安徐邳諸處儲積委官監臨收放仍行各府州縣亦量為儲積以時斂散從之

六年四月命甘肅糴糧貯預備倉

甘肅巡撫徐廷章言河西一帶居人別無營業止是耕收豐年上納籽粒外所餘無幾今甘肅倉庫收司

餘剩糧價乞量借二三年之數督同管糧官於秋成之際委官照依時直糴糧於預備倉收貯春放秋收以備兵荒之用後有贏餘盡數留邊為官軍月糧事
下所司

十八年正月命南京糴常平倉糧

時歲饑米價騰貴而常平所儲糧八萬六千餘石戶部請減價糴之以濟民候秋成平糴還倉其糴於民多不過五斗務使貧民得蒙實惠報可

孝宗弘治三年三月限州縣衛所積穀數以多寡為殿
最

命天下州縣預備倉積糧計里之多寡自十里以下
至八百里以下積穀萬五千石至十九萬石各有差
及數者為稱職過額者奏請旌擢不及者罰之各府
州正官亦視所屬糧足否以為黜陟其軍衛亦畧倣
此數以量示勸懲從給事中羅鑒奏也

食貨志曰十里以下積萬五千石二十里積二萬

石衛千戶所萬五千石百戶所三百石考滿之日
稽其多寡以為殿最不及三分者奪俸六分以上

降調

十八年八月

時武宗
已即位

令贖罪贓罰銀皆糴穀入預備倉

先是六月從尚書馬文升言命州縣四倉復古制兼
設法措置俾儲蓄充而凶荒有備至是從御史沈賚
等言儲蓄事宜令在外司府州縣贖罪贓罰等銀悉
折納穀以備賑濟仍具冊報部稽考正德元年正月

陝西巡撫楊一清以預備救荒事宜上請廷臣議問
刑贖罪楮價聽收納粟米穀麥貯預備倉以備賑貸
十二月太常寺少卿喬宇亦以此為言俱從之後又
令因納楮者以十之八折米入預備倉軍官犯者納
穀準立功

臣等謹按武宗實錄正德四年十月部議總督蘇
松等處糧儲副都御史羅鑒所陳事宜可行者七
一戶部初奏荒政各府州縣驗里分多寡以為積

糧等第今宜查照冊籍額定等數以便措置仍查
職掌官員支放數足方許給由陞調是即弘治三
年從鑒所奏而行之者也二清查囚犯贓罰紙劄
置立文簿各照年月日期填寫不許漏隱是即帝
初即位所著為令者也三放支預備倉糧務在年
歲荒歉人戶極貧不許冒領仍革里書濫放之弊
四各府州縣多有空閒田地并湖蕩池塘稅糧盡
入預備倉收貯宜委官查理俟年荒給放五舊例

客商引錢一分而官二分收買米穀以備賑濟近年引錢并米穀迄無定數宜稽考以治侵匿之罪六人戶納解錢糧違限者每日罰米一升此係見行事例宜申明施行七倉廩損壞坍塌所在官司官宜即時修葺詔依擬行焉

武宗正德三年七月詔以預備倉糧數少及不完者皆所在官司侵盜所致其違官去任致仕為民者命遣官及撫按官查提加倍賠納以聞

戶部奏天下軍衛有司預備倉糧額數俱有題准事
例今湖廣巡撫張子麟繳到糧冊惟武昌等府崇陽
澧州隨州襄陽四州縣足原擬之數餘多不及蓋因
各府州縣衛所正官不能措置分巡分守管糧等官
又不依期比較宜行各處撫按官督同司府州縣掌
印等官將各倉糧斛自弘治十年以後備查放過并
見在之數通算三年之內某處足數并不及有餘備
開等第年終盤糧造冊咨部以憑奏處其放過賑濟

之數自弘治十六年蠲免以後務於秋成抵計追還
此外或紙價引錢量留三分之一於本處糴買或地
方有力之家可以勸借或山林川澤之利可以區畫
俱聽所在官司盡心處置務使三年之內補足原擬
糧數遂有是詔并命差去侍郎韓福等查提倍償

五年十一月革除天下預備倉倉官

初預備倉皆設土倉官至是革之令州縣正官或管
糧官領其事

命運銀赴大同召商糴買糧料

總理大同糧儲郎中解經奏料糧缺乏乞并太原府
以北俱徵本色府南不為常例部議太原府南折徵
已定其府北例徵本色頃因小民樂於簡便官吏憚
於催徵任情更改以致闕乏宜照舊徵納戶部仍運
送銀十萬兩至彼召商糴買從之

大學衍義補曰考耿壽昌初立常平時兼請立於
邊郡今竊以為內地行之不能無弊惟用之邊郡

為宜宜於遼東大同宣府極邊之處各立常平司
每歲收成之候穀不必一種惟其賤而收之官不
必定價隨其時而予之可久留者儲之以實邊不
可久者隨時給廩食之人凡諸穀一以粟為則如
粟直八百豆直四百則支一石者以二石與之他
皆倣此然後計邊倉之所有預行應運邊儲州縣
俾依價收錢以輸於邊如此則不獨可以足邊郡
亦可以寬內郡矣

又論和糴曰馬端臨言唐以前所謂糴者聚米以賑民宋以後所謂糴者聚米以養兵今日宜以賑民者行之內郡置常平司於遼以東淮以北養兵者行之邊郡遼東大同諸處前已言之未必無補於儲蓄之計也

世宗嘉靖初令有司倣常平法并定積穀數

諭德顧鼎臣言成弘時每年以存留餘米入預備倉緩急有備今秋糧僅足兌運預備無粒米一遇災傷

輒奏留他糧及勸富民借穀以應故事乞急復預備
倉糧以裕民帝乃令有司設法多積米穀仍倣古常
平法春賑貧民秋成還官不取其息府積萬石州四
五千石縣二三千石為率既又定十里以下萬五千
石累而上之八百里以下至十九萬石

食貨志曰自後積粟盡平糶以濟貧民儲積漸減
至隆慶時劇郡無過六千石小邑止千石久之數
益減科罰亦益輕萬厯中上州郡至三千石止而

小邑或僅百石有司沿為具文屢下詔申飭率以
虛數欺罔而已

元年正月令委官召商糴買米麥以濟緩急

守備紫荆關太監耿忠奏新城等倉放支畧盡軍無
見糧乞行所在徵納本色或召商糴買以濟緩急戶
部議往者夏秋稅糧皆不盡一承解包納之徒得以
候時貴賤自擇本折去取肆其漁獵頃奏行折收召
買之例穀賤召買貴折銀而官價不虧穀貴放本色

穀賤放折色而軍士沾惠計無便於此者但本折二色未定關支月分委官樂折支之便召買坐糜而軍飽恒苦不給請自今為始本折間月關支其折色每石如例給銀四錢五分其本色聽委官召買支用或價直太高召買不及每石加銀二錢給之候米麥價平及期貿易本色務足半年之用報可

八年令設社倉

先是弘治中江西巡撫林俊嘗請建常平及社倉至

是乃令各撫按設社倉令民二三十家為一社擇家
殷實而有行義者一人為社首處事公平者一人為
社正能書算者一人為社副每朔望會集別戶上中
下出米四斗至一斗有差斗加耗五合上戶主其事
年饑上戶不足者量貸稔歲還倉中下戶酌量賑給
不還倉有司造冊送撫按歲一察覈倉虛罰社首出
一歲之米其法頗善然其後無力行者

十二年令以贖緩引稅糴穀備賑

戶部尚書許瓚言郡縣贖鍰引稅多乾沒無稽宜令
糴穀備賑從之

穆宗隆慶三年七月詔天下有司實修積穀備荒之政
神宗萬曆二十九年十二月福建有倡義建常平等倉
者命獎勵之

巡撫金學曾以鄉官陳長祚林鳴盛等倡義建常平
倉於官勸義倉於民又有義廩以倡縉紳之尚義者
乞量加服色以示獎勵從之

三十九年四月設邊鎮常平倉

時遼東巡撫熊廷弼上設常平倉括錢糴穀備邊之數帝曰常平有裨邊鎮令以後接管官照例奏報仍載入考成


熹宗天啟五年二月令延綏各堡糴買儲倉如常平法巡按陝西御史蔣允儀言延綏兵馬甲天下近日民運逋欠京運愆期倉庫蕩然倘有變故何以支持乞清查各堡撫賞節省銀兩分發各路監收官就近委

賢能之員限日糴買酌量各堡應貯多少來春價騰
出糴秋入春出一如常平法部議從之

九月給事中王夢尹奏寬天津糴買米豆之數事下所
司

夢尹言天津米豆全賴真順保河等府為之糴買輸
運今三伏不雨繼以秋旱定興等處飛蝗蔽天米值
一斗至一錢四五分豆一斗至一錢二三分秋成且
然況明春乎畿輔近地與宗社相關原派闕門米豆

之數當照災傷輕重道里遠近價值高下逐一酌量
庶寬一分民受一分之賜疏下部議



欽定續文獻通考卷二十七

欽定四庫全書

史部

欽定續文獻通考卷二十八

編修_臣 翟槐覆勘

總校官內閣中書_臣 孫溶

欽定四庫全書

欽定續文獻通考卷二十八

土貢考

臣等謹按馬端臨作土貢考謂古之土貢即在賦稅之中猶曰當其租入云爾後世則租自租而貢自貢矣唐代每年常貢馬氏皆依諸郡分列而於宋之土貢則云土產已見地里考惟錄罷免蠲除之詔旨然於元豐間聖節南郊進奉之數仍備載

之當時諸路所奉皆金銀錢帛之屬不盡任土所
有也遼之軍國經費多仰給於鄰國歲幣及諸屬
國歲貢方物史載諸部之入貢者往往一歲屢見
或一月屢見而名與數俱未及詳金制多承遼舊
遼時所貢如白鹿白麋白雉白兔等史所必書而
金史則不多概見元史所載貢獻事跡最繁明初
令天下貢土所有以為常額珍奇不與焉自中官
競尚貢獻以採辦為名而誅求發運其弊且不可

勝言矣今自宋嘉泰以後考史志所有者以次臚載至於外國之貢原與任土不同然周官太宰所職九曰物貢謂九州之外各以其所貢為贄是足以驗聲教之所及故亦附詳焉

歷代土貢

進奉羨餘

宋寧宗嘉泰元年十月詔免瑞慶節諸道入貢

先是紹興三十二年孝宗即位七月罷諸路聖節進奉隆興元年詔自後內外主兵官進奉會慶聖節沈

香不得過二十兩馬不得過四匹餘物並不得投進
乾道八年天中聖節知光州滕瑞自書聖壽萬歲四
字約二丈餘兼造山棚高三丈餘凡用絹五十匹標
背投進帝曰滕瑞不修郡政以此獻諛特降一官淳
熙十五年正月詔免諸州軍會慶節進奉二年至是
復有此詔

是年真里富國獻馴象二

至開禧元年十二月又獻瑞象

嘉定五年九月遵義砦夷楊煥來獻馬

理宗紹定五年免陵寢進獻

詔大行皇太后陵寢諸路監司州府軍監寺止進慰
表其餘禮物並令免進仍勿以助修奉攢宮為名有
所貢獻

六年卻歸正番臣康守正王全所獻馬

初紹興三十一年高宗謂輔臣曰近大將入覲有以
寶貨鞍馬獻者惟馬不可缺餘皆却之至是帝既却

所獻復出御札賜輔臣曰近康守正王全以馬來獻朕方禁飭臣下勿受餽遺豈肯自開此門兼恐遠人以此窺朕好尚昔漢文却千里馬朕素慕之卿等以為何如輔臣乞宣付史館從之

宋史董槐傳曰槐提點廣西刑獄邕州之地西通諸蠻夷南引交趾及符奴月烏流麟之屬數寇邊槐與約毋相侵推赤心遇之皆伏不動又與交趾約五事一無犯邊二歸侵地三還所掠生口四奉

正朔五通貿易於是遣使來獻方物大象

景定元年詔監司郡守今後移易窠名輒行獻羨者依祖宗故典行之著為令

先是紹興三十一年兩浙轉運司獻趙積錢二萬緡
臨安府獻五萬緡命椿留外府并下諸路切戒毋得
科敷孝宗隆興元年十二月詔諸路州軍歲起上供
錢物例有拖欠監司郡守却以羨餘進獻僥冒賞典
今後上供錢物須官依限起發數足如輒行率斂進

獻本部按劾以聞於是廣東提刑司獻緡錢十五萬
詔卽撥賜廣西充今年上供錢乾道三年湖南安撫
使劉珙入見論羨餘之弊曰州縣賦入有常大郡僅
足支遣小郡往往匱乏而近者四方尚有以贏餘獻
者不過重折苗米或倍稅商人此民之未便者也望
詔止之帝嘉納焉淳熙二年十一月提點坑冶王楫
進羨餘十萬緡詔却之

互見坑冶考

五年四月知紹興府

張津進羨餘四十萬緡詔以代民輸和買身丁之半

五月禁諸路州軍責屬縣進羨餘六年正月蠲夔州路上供金銀至是以倪垕獻羨希賞再削一官仍著是令

孝宗乾道九年侍御史蘇疇奏曰伏覩廣南提舉廖顥劄子廣州都監倉有積下鹽本銀計錢十一萬一千餘貫又本路州府逐年拘收常平諸色錢物內有寬剩錢五萬貫欲行起發少助朝廷經費奉旨並赴南庫送納者臣竊謂陛下即位以來屢

却羨餘之獻故近年監司州縣稍知遵守此盛德之事而小人急於自進時以一二嘗試朝廷只緣乾道七年提舉官章潭獻錢二十萬貫特轉一官不及期年轉為廣西運判廖顥實繼其後故到官未幾便為此舉愚弄朝廷莫此為甚訪聞此錢並係鹽本錢潭到任時尚有三四十萬緡皆是前官累次儲積不敢妄用潭取其半以獻今顥所獻止十一萬緡已是竭澤所餘無幾後人何以為繼異

時課額不登誰任其咎乞特降旨却而不受即以
此錢付本司依舊充鹽本常平寬剩錢亦乞椿留
本路為水旱賑貸之備詔從之

宋史葉顥傳曰顥知處州青田令陳光獻羨餘百
萬顥以所獻充所賦繼知常州初至郡無旬月儲
未一年餘緡錢二十萬或勸獻羨顥曰名羨餘非
重征則橫斂是民之膏血也以利易賞心實恥之

二年十一月安南國貢象二

初孝宗淳熙十年十一月廣西奏安南牒辦章表投進方物帝曰象乃無用之物經由道路重困吾民除不受外將入貢之物十分為率止受一分就界上交納至是復貢象五年五月安南國奉表謝恩又進方物詔却之仍賜金帛以獎恭順

劉珙傳曰乾道時安南貢象所過發夫除道毀屋廬數十州騷然珙為湖南安撫使奏曰象之用於郊祀不見於經驅而遠之則有若周公之典且使

吾中國之疲民困於遠夷之野獸豈仁聖之所為哉

度宗咸淳二年八月安南國遣使賀登位進方物

九年六月安南國又進方物特賜金五百兩帛百匹

荆湘貢茶片

荆南府租額錢三十一萬五千一百四十八貫三百

七十五文納潭鼎澧岳歸陝州荆南府片散茶共八

十七萬五千三百五十七斤

漢陽軍祖額錢二十一萬八千三百一十一貫五十
一文納鄂州片茶二十三萬八千三百斤半

蘄州蘄口額錢三十五萬九千八百三十九貫八百
一十四文納潭州興國軍片茶五十萬斤

麻城場買茶二十八萬四千二百七十斤賣錢一萬
二千五百四十貫

蘄州洗馬場買茶四十萬斤賣錢二萬六千三百六
十貫

王祺場買茶一十八萬二千二百二十七斤賣錢一
千九百五十三貫九百九十二文

石橋場買茶五十五萬斤賣錢三萬二千八十貫

福建路每年常貢

福州荔枝乾荔枝煎生荔枝

紹興初貢二十四年罷

紅蕉花布

大中祥符天聖元祐
間俱貢紹興初罷

乾薑沙魚

建炎三年罷

鹿角菜紫菜

俱宣和
七年罷

蕉乾 建炎初罷 上供銀六萬八千七百四十一兩

四錢大禮銀

每遇郊祀年別
進奉九千兩

上供錢六千貫無額上

供錢一萬五千五百一十八貫七百五十文甲葉六萬八千九百一十五片黃牛皮九百四段六十尺羊皮一千八百一十二張一十丈認發建寧府黃牛皮四十八段羊皮八十九張泛拋每歲兩科甲葉六萬五千片黃牛皮八百段羊皮七百張

建寧府上供細色茶五綱粗色茶七綱練布又年額上供銀九千七百五十四兩大禮助賞銀三千七百五十六兩聖節銀大禮進奉銀各一千七百兩提點

司進奉銀三十七兩五錢

以上俱建安甌寧嘉禾松溪政和五縣所貢

泉州蕉布

永春縣出

生苧布各二十匹綿一百兩

南安縣出俱淳

祐中貢

山薑花三十朶橄欖子上色一萬顆次色三萬

顆

治平六年罷

綿一百兩蕉布葛布共五十匹

元豐松子中貢

五百斤

宣和六年詔減後罷

上供銀九千六百四十二兩三錢

上供錢一萬五千七百六十五貫七十五文大禮賞

給錢一萬八千九百九十五文春冬衣賜

錢二萬六千二百貫五百二十五文犒軍錢三千七

百二十三貫四百文

漳州鮫魚皮柑橘

汀州蠟燭二百條上供銀七千九百四十五兩八錢
三分五釐聖節進奉銀大禮銀各二千兩上供錢九
千七百七十貫九百一文

南劍州土茴香茶又銀六千三百七十兩

此順昌一縣所供

邵武軍上供銀一千四百四十一兩四錢乾會聖節
銀二百五十兩大禮銀四百兩

興化軍綿一百兩葛布一十匹上供錢七千五百四十貫文節旦上供銀共一千八百三十三兩三錢三分四釐

臣等謹按王圻續通考及謝方叔傳孝宗淳熙六年趙雄等奏謝賜新荔支流香酒帝曰朕却獻方物四方珍味嘉果俱不至昨太上皇帝賜到新荔支即以分賜卿等朕聞舊日京師謂之獻時新遠方奔走爭先勞人動衆害物甚多朕欲痛革此事

故盡却時新之物蓋世俗既競時新則不待物性
成就爭先採摘甚可惜也及度宗即位謝方叔既
罷相歸豫章以琴一鶴一金丹一來進蓋以舊學
故也賈似道疑其有希望再相意諷權右司郎官
盧越等劾之以為不當誘人主以聲色之好制置
使呂文德願以己官贖其罪方得免論者曰專權
忌能似道固不能無責而間居以玩好丹劑為人
主壽坐受貶削有愧金鏡多矣

遼太祖二年八月幽州進合歡瓜

五年七月薩勒題洎諸蕃使來貢

七年十月和州回鶻來貢

九年十月新羅國遣使貢方物

至天贊三年十一月又來貢

高麗遣使進寶劍

吳越王錢鏐遣滕彥休來貢

至神冊元年六月彥休復來貢五年五月吳越王遣

滕彥休貢犀角珊瑚授官以遣天贊二年四月復遣使來貢太宗天顯七年二月又遣使獻寶器會同三年正月九月四年十月六年三月俱來貢

臣等謹按遼會同六年即晉天福七年吳越忠獻王佐初立之年也嗣是又三十餘年而後納土於宋今考遼史則自會同六年後即不復貢於遼矣神冊三年三月晉吳越渤海高麗回鶻準卜黨項及幽鎮定魏潞等州各遣使來貢

臣等謹按是年即梁太祖貞明四年也歐陽修五代史載唐哀帝天祐元年晉王李克用會契丹安巴堅於雲中約為兄弟至是其子存勗嗣立已十年猶稱唐天祐十五年不載通貢於遼史

天贊二年六月波斯國來貢

遼屬國可紀者五十有九朝貢無常波斯其一也

三年九月大食國來貢

至聖宗開泰九年十月貢象及方物

回鶻已哩遣使來貢

四年四月回鶻烏穆珠汗遣使貢謝聖宗開泰五年
六月回鶻獻孔雀興宗重熙二十一年十一月回鶻
阿爾斯蘭遣使貢名馬文豹道宗大安五年五月回
鶻貢良馬七年七月回鶻遣使貢異物不納厚賜遣
之

十月高麗日本二國來貢

國外烏爾古迪里八部等共十部來貢

此十部不能成國附庸於遼時叛時服各有職貢猶唐人之有羈縻州云

太宗天顯三年正月黃龍府婁尼河女直達嚕噶來貢
二月達嚕噶來貢

二月特哩袞呢嚕古進白狼

至會同元年二月室韋進白麋六年六月錫爾古勒
濟部進白麋穆宗應歷二年十月司徒隆科等獻白
雉聖宗統和十四年閏七月五院部進穴地所得金

馬興宗重熙二十一年九月平州進白兔道宗大安
七年六月倒塌嶺人進古鼎有文曰萬歲永為寶用
臣等謹按遼之土貢史未及詳以上所錄皆非常

貢又天顯九年正月南京進白麀會同六年六月
莫州進白鵲穆宗應歷二年十一月朔州民進黑
兔十五年六月伊楞古進良馬聖宗統和九年八
月東京進三足烏十二年十二月高麗進妓樂却
之二十年七月高麗進本國地理圖二十六年五

月又進龍鬚草席興宗重熙二十一年九月平州
進白兔道宗太康三年九月玉田貢嘉禾天祚帝
天慶三年六月烏梁海國貢良犬凡此類亦非常
貢也

十月唐遣使遺玉笛

七年七月遺紅牙笙其盧龍軍節度使趙德軍進時
果

五年三月人皇王獻白紵

十月又進玉笛

七年十一月準卜貢海東青鶻三十連

至興宗重熙十七年六月準卜獻馬駝二萬十八年

六月準卜貢馬駝珍玩二十二年七月準卜大王通

特古斯率諸部長獻馬駝道宗太康四年六月準卜

諸酋長進良馬

九年正月黨項進駝鹿

九月黑車子室韋貢名馬穆宗應歷二年四月鐵驪

進鷹鵠十三年五月烏梁海國所進花鹿生麝聖宗
統和十三年五月高麗進鷹十二月鐵驪遣使貢鷹
馬二十四年八月沙州燉煌王曹壽進大食國馬及
美玉太平元年十月迪里苜長頗白來貢馬駝興宗
重熙十九年六月輝發哈斯罕博囉滿達部各貢馬
道宗清寧八年五月武都溫特哩袞圖圖爾噶等乞
歲貢馬駝許之大安元年正月五國苜長來貢良馬
壽隆二年八月八部進馬

十二年三月晉遣使來貢

十一年十一月冊石敬瑭為大晉皇帝至是遣使來貢六月遣使請上尊號及歸雁門以北與幽薊之地仍歲貢帛三十萬匹詔不許八月復遣使來貢至會同元年十月遣使來謝冊禮復進獨峰駝及名馬二年正月貢珍幣并遣使謝免沿邊四州錢幣七月進犀帶八月貢歲幣奏輸戌亥二歲金幣於燕京三年四月進茶藥又進端午節物五月進弓矢九月貢名

馬十月貢布四年二月進香藥三月以許祀南郊遣使來謝進黃金十鎰四月進櫻桃七月進水晶硯八月進犀弓竹矢五年四月進射柳鞍馬六月晉齊王重貴遣使來貢時敬瑭殂重貴立稱孫不稱臣帝始有南伐之意六年二月晉遣使進先帝遺物六月遣使貢金八月復貢金七年十月天授節諸國進賀惟晉不至至九年而晉亡矣

八月太原劉知遠遣使來貢

至穆宗應歷元年十二月漢遣使獻弓矢鞍馬二年
十月又進葡萄酒三年三月進球衣及馬九月貢藥
四年二月進茶藥十二月遣使來貢七年五月遣使
來貢十六年八月貢金器鎧甲十二月遣使來貢十
九年三月進白麀景宗保寧二年十二月三年十月
五年正月皆來貢七年二月漢雁門節度使劉繼文
來朝貢方物九年八月遣使進葡萄酒

臣等謹按葉隆禮契丹國志遼太宗既立石敬瑭

為晉帝臨別時言劉知遠等皆勦業功臣無大故
勿相棄也然不載十二年八月劉知遠遣使來貢
事至會同十一年六月知遠稱帝於晉陽未及四
載即為後周廣順元年知遠弟崇自立於太原為
周所攻乃於世宗天祿五年六月遣使稱姪乞援
且求封冊嗣是傳三世凡二十餘年皆進貢於遼
迨景宗乾亨元年六月劉繼元降宋遼不能救而
漢遂亡

是月南唐李昇遣使來貢

至會同元年六月南唐來貢二年五月又遣使來貢
三年四月進白龜四年正月又遣使來貢穆宗應歷
二年正月進犀兕甲萬屬三月五月復來貢三年三
月五年十月七年六月俱來貢

臣等謹按契丹國志載會同元年五月吳徐誥欲
結遼取中國遣使以美女珍玩泛海修好遼太宗
亦遣使報之七月誥稱帝國號南唐復姓名李昇

則此稱南唐李昇亦從後追書之詞耳又天會元年南唐建國即晉天福二年自此至應歷七年凡二十二年書貢不絕而七年後不復見者蓋其時為周所伐又十餘年且俘於宋矣

世宗天祿五年正月周遣使致良馬

時郭威自立國號周遣朱憲來告即遣使致良馬

聖宗統和元年十月命每歲諸節度使貢獻如契丹宮
例止進鞍馬

從燕京留守于越休哥言也

十二月以顯州歲貢綾錦分賜左右

四年十月西夏遣使來貢

時李繼遷叛宋始來附自後六年七年俱來貢八年

三月又來貢十二月遣使封繼遷為夏國王十年十

月來貢十二年又入貢十三年三月來貢八月進馬

十四年正月十五年二月十二月十六年二月俱來

貢十九年遣李文冀來貢

冀本紀作貴

二十年正月進馬

駝二十三年三月繼遷薨其子德昭遣使上遺物開
泰元年四月德昭遣使進良馬太平元年十二月來
貢十一年聖宗崩報哀於夏遣使來進賻幣興宗重
熙元年德昭薨子元昊立二年正月七年三月遣使
來貢十二月四月進馬駝十三年十月進方物十四
年正月進鶻閏五月來貢十七年元昊薨子諒祚立
二月遣使上遺物十八年六月遣使來貢留之不遣
二十年五月諒祚母表乞如黨項權進馬駝牛羊等

物二十三年正月貢方物五月諒祚乞進馬駝詔歲貢之是月遣使來貢道宗咸雍四年諒祚薨子秉常立三月遣使獻遺物十二月遣使來貢九年十二月來貢太康五年十月八年六月俱來貢大安二年秉常薨子乾順立遣使上遺物天祚帝乾統五年六月遣使貢方物天慶三年六月遣使來貢

六年五月詔威裕悅部自今止進牛馬

威裕悅部以歲貢貂鼠青鼠皮非土產皆於他處貿

易以獻乞改貢故有是詔

十五年三月烏舍烏哲圖以地遠乞歲時免進鷹馬貂皮詔以生辰正旦貢如舊餘免

四月罷奚王部歲貢麋

十月罷奚王諸部貢物

二十一年十二月罷三京諸道貢

二十二年三月罷蕃部賀正齡節及重五冬至貢

十二月宋遣李繼昌請和願歲輸銀十萬兩絹二十萬

匹許之

至二十三年十月宋歲幣始至後為常

開泰七年三月命東北約囉都圖阿里鄂羅木博諾里
鐵驪等五部歲貢貂皮六萬五千馬三百

八年七月詔準卜依舊歲貢馬千七百駝四百四十貂
鼠皮萬青鼠皮二萬五千

九年十月詔遣官督黨項部宋犀族貢

西南招討奏黨項部有宋犀族輸貢不時常有他意

宜以時遣使督之詔曰邊鄙小族歲有常貢邊臣驕縱徵斂無度彼懷懼不能自達耳第遣清慎官將示以恩信無或侵漁自然効順耳

興宗重熙十一年閏九月壯院樞密副使耶律仁先遣人報宋歲增銀絹十萬兩匹文書稱貢

時宋請增歲幣銀絹以償十縣地產

謂取晉陽及瓦橋以南十縣

仁先與翰林學士劉六符使宋仍議書貢宋難之仁先曰曩者石晉報德本朝割地以獻周人攘而取之

是非利害灼然可見宋無詞以對六符曰本朝兵強將勇海內共知人人願從事於宋若恣其俘獲以飽所欲與進貢字孰多況大兵駐燕萬一南進何以禦之顧小節忘大患悔將何及宋乃定議歲幣稱貢至十八年六月以遼師伐夏遣使致贐禮二十四年正月遣使餽馴象道宗壽隆四年正月遣使餽錦綺天祚帝天慶五年七月遣使致助軍銀絹

臣等謹按宋史富弼傳曰契丹謂南朝遺我之詞

當曰獻否則曰納弼爭之契丹主曰南朝既懼我
矣於二字何有若我擁兵而南得無悔乎弼曰本
朝兼愛南北故不憚更成何名為懼或不得已至
於用兵則當以曲直為勝負非使臣之所知也契
丹主曰卿勿固執古亦有之弼曰自古惟唐高祖
借兵於突厥當時贈遺或稱獻納其後頡利為太
宗所擒豈復有此禮哉弼聲色俱厲契丹知不可
奪乃曰吾當自遣人議之復使劉六符來弼歸奏

曰臣以死拒之彼氣折矣可勿許也朝廷竟以納
字與之與遼史文書稱貢之說各異

十二年五月鄂囉博囉滿達部二使來貢失期宿而遣
之

道宗太康三年正月省諸道春貢金帛及停周歲所輸
尚方銀

大安三年四月免諸路貢輸之半

十月罷節度使以下官進珍玩

四年四月減諸路常貢服御物

壽隆三年六月詔罷諸路馳驛貢新

先是太康八年二月詔北南院官凡給繹者必先奏聞惟貢新許馳驛至是罷之

天祚帝乾統九年十二月高麗遣使來貢

臣等謹按遼本紀及兵衛志高麗西夏女直俱在五十九屬國中而高麗與遼相為始終二百餘年先是聖宗太平九年大延琳作亂南北女直皆從

延琳高麗亦稽其貢及渤海平仍歲貢不絕是後
女直起兵建國號金反索歲貢方物於遼天慶十
年乞兵於高麗以禦金金人責之未幾而遼亡保
大二年天祚播遷夏兵來援為金所敗請臨其國
六月遣使冊李乾順為夏國皇帝而天祚被執歸
金蓋屬國之中二國最大而尤恭順也

新羅國進貢物

金器二百兩金抱肚一條五十兩金鈔羅五十兩金

鞍轡馬一匹五十兩紫花綿紬一百匹白綿紬五百匹細布一千匹粗布五千匹銅器一千斤法清酒醋共一百瓶脍先茶十斤藤造器物五十事成形人參不定數無灰木刀擺十箇細紙墨不定數不論年歲惟以八節貢獻

又橫進物為粳米五百石糯米五百石織成五綵御金不定數

西夏國進貢物

細馬二十匹粗馬二百匹駝一百綺錦二百匹織成
錦被褥五合蓂蓉甘石石井鹽各一千斤沙狐皮一
千張兔鶻五隻犬子十隻不論年歲惟以八節貢獻
高昌國龜茲國于闐國大食國小食國甘州沙州涼州
諸小國進貢物

玉珠犀乳香琥珀珊瑚瑪瑙器寶鐵兵器斜合黑皮
褥黑絲門得線帕黑絲賜黑絲以下皆細毛皆三年
一次貢獻

金太祖天輔四年高麗貢方物

至太宗天會四年高麗國王王楷奉表稱藩自後貢
使不絕海陵貞元二年十二月遣使貢方物先是高
麗使者別有私進禮物以為常至世宗大定五年萬
春節帝以使者私進不應典禮詔罷之十七年賀正
且禮物玉帶乃石似玉者有司請移問帝曰彼小國
無辨識者誤以為玉耳且人不易物惟德其物若復
却之豈禮體耶乃止章宗泰和七年正月是時用兵

伐宋夏亦有故獨高麗遣使來迨宣宗遷汴遼東道路不通興定三年遼東行省奏高麗復有奉表朝貢之意乃遣使撫諭終以道路不通未遑迎迓詔行省且羈縻勿絕其好然自是不復通問矣

七年正月宋遣趙良嗣言若得燕京即納銀絹二十萬匹綾二萬匹以代燕地租稅

至太宗天會三年十月伐宋十二月宋給事中李鄴等奉金百錠請復修好四年正月都統宗望許宋修

好增歲幣六年七月宋貶號稱臣遣使奉表容州觀
察使曹勛求許歲幣自是每春季差人至泗州交納
熙宗皇統二年二月宋遣使來許歲幣銀絹二十五
萬兩匹世宗大定五年正月宋遣使以國書來奉歲
幣二十萬二十八人二月遣使獻先帝遺留物及朝
辭以所獻禮物中玉器五玻璃器二十及弓劍之屬
使還遺宋曰此皆爾國前主珍玩之物所宜寶藏以
無忘追慕今受之義有不忍歸告爾主使知朕意也

自此往來不絕至泰和中構兵後復以書幣乞和至八年二月復請增歲幣至三十萬迨宣宗貞祐三年三月宋賀長春節使朝辭請減歲幣如大定例帝以本自稱賀不宜別有祈請諭遣之興定元年四月以宋歲幣不至命烏古論度壽經畧南邊貢使遂絕

太宗天會二年正月夏人奉誓表請朝貢

夏國王李乾順請自今以後凡歲時朝賀貢進表章使人往復等事一切依臣事遼國舊例至熙宗天眷

二年子仁孝嗣位世宗大定八年其臣任得敬專國
政欲分割夏國因賀正旦乞良醫亦附表進禮物帝
却之十年復却得敬貢物八月仁孝誅得敬深念世
宗恩厚十七年獻本國所造百頭帳帝曰夏國貢獻
自有方物可却之仁孝再以表上曰所進帳本非珍
異使人亦已到邊若不蒙包納則下國深誠無所展
效四方鄰國以為夏國不預大朝眷愛之數將何所
安乃許與正旦使同來至章宗以後雖通使如故而

無納貢事矣

四年八月新城縣進白鳥

五年正月回鶻哈喇汗遣使入貢

十月沙州回鶻呼喇繖汗遣使入貢熙宗天眷元年
八月回鶻遣使朝貢

臣等謹按金史屬國貢獻不多概見而回鶻獨著
至貞元時以回紇與宋高麗夏並稱殆以其國為
較大歟

熙宗皇統七年十一月兵部尚書秉德進三角羊
海陵大德三年四月罷歲貢鷹隼

閏四月命大官常膳惟進魚肉舊貢鵝鴨等悉罷之

貞元元年正月詔有司受宋高麗夏回紇貢獻

以皇弟克甍不視朝故也

世宗大定三年十一月罷貢金線段匹

四年正月罷路府州元日及萬春節貢獻

十三年七月罷歲課雉尾

二十年十月詔罷西北路招討司所進馬駝鷹鵲等物
二十六年十二月罷遞送荔支

帝退朝御香閣左諫議大夫黃久約言遞送荔支非
便帝諭之曰朕不知也今令罷之越二日帝謂宰臣
曰有司奉上惟沽辦事之名不問利害如何朕嘗欲
得新荔支兵部遂於道路特設鋪遞比因諫官黃久
約言方知之夫為人無識一旦臨事便至顛倒宮中
事無大小朕嘗親覽者以不得人故也如使得人寧

復他慮次日又謂宰臣曰朕年來惟以省約為務常
膳止四五味已饜飫之比初即位十減七八宰臣曰
天子自有制不同餘人帝曰天子亦人耳妄費安用
又久約使宋還道經宿泗見貢新枇杷子者州縣調
民夫遞進亦奏罷之

二十七年五月罷太府監日進時果

時并罷海蘭路所貢海葱詔曰葱果應用幾何徒勞
人耳惟上林諸果三日一進

二十九年十二月

時章宗已即位

密州進白雉

章宗明昌四年正月諭東京路副使王勝母進鷹

遣諭之曰汝職非輕民間利害官吏邪正畧不具聞而乃以鷹進此豈汝職也後毋復爾

泰和元年十一月諭工部毋以進柑擾民

諭曰比聞懷州有橙結實官吏檢視已嘗擾民今復進柑得無重擾民乎其誠所司遇有則進無則已

宣宗貞祐三年九月陳州鎮防軍段仲連進羊三百詔

遷三官

臣等謹按史臣論宣宗南開宋衅西啟夏侮兵力既分功不補患乃至以進羊遷官亦可慨矣

哀宗正大元年正月邠州節度使伊喇瑪納布貢白兔却之

詔曰得賢臣輔佐年穀豐登此上瑞也馬事此為令有司給道里費縱之本土禮部其徧諭四方使知朕意

六年五月隴州防禦使舒穆魯棟爾進黃鸚鵡

詔曰外方獻珍禽異獸違物性損人力令勿復進

天興元年四月許州進櫻桃

時帝在南京

諸路貢物

上京路會寧府歲貢秦王魚

大定十二年罷

又貢猪二萬

大定

二十五年罷

哈蘭路貢海葱

大定二十七年五月罷

東京路復州貢鹿筋

大定八年十月罷

西京路大同府貢瑪瑙環子瑪瑙數珠蔚州貢地簞
中都路涿州貢羅平州貢櫻桃綾

河東南路京兆府同州貢圓筋繭角羊

大定十一年罷

以上俱據地理志所載姑錄如右然其詳不可得考矣
元太祖二年伊德爾訥呼部阿勒達爾部皆通使來獻
名鷹

王圻曰按馬貴與考凡外國貢獻俱不錄豈以不
列職方非任土歟元起沙漠版圖遍海外視諸國

猶六服耳故稍摘其雅馴者著於篇且亦以志當時之好尚焉

臣等謹按王圻續通考於遼金二代曾載與國之貢而元獨缺焉其他所載挂漏亦多今詳稽紀傳事以類叙使後有考云

九年三月金遣使奉金帛童男女五百馬三千以獻初帝貢歲幣於金金主使衛王允濟受貢於靜州帝見允濟不為禮允濟歸欲請兵攻之會庚午歲金主

環殂允濟嗣位有詔至國傳言當拜受帝問新君為誰曰衛王也帝遽南面唾曰我謂中原皇帝是天上人做此等庸懦亦為之耶何以拜為即乘馬北去金使還言允濟益怒欲俟帝再入貢就進場害之帝知之遂與金絕益嚴兵為備辛未歲二月帝自將南伐屢敗金兵至是年甲戌春三月駐蹕中都北郊諸將請乘勝破燕帝不許乃遣使諭金主曰汝山東河北郡縣悉為我有所守惟燕京耳天既弱汝我復迫汝

於險天其謂我何我今還軍汝不能犒師以彌我諸將之怒耶金主遂遣使求和奉衛紹王女岐國公主及金帛等以獻

臣等謹按元紀太祖稱帝歲在丙寅即金章宗泰和六年也至二十一年遣唐慶責歲幣於金太宗元年金遣使來歸太祖賙却之復遣使來聘不受六年金遂亡矣

十三年高麗請歲貢方物

至世祖中統二年六月三年六月四年三月俱遣使
入貢至元元年四月詔修世見禮遣其臣來貢二年
八月貢方物八年正月遣使奉歲貢五月遣貢方物
九年正月遣使奉歲貢十一年正月十二年正月俱
遣使奉歲貢十六年正月奉歲幣又獻方物十八年
正月遣使奉歲帛十九年正月遣使貢細布四百匹
二十二年六月遣使來貢二十五年五月十月十二
月二十六年正月二十七年正月二十八年正月俱

遣使來貢及方物成宗大德十年正月遣使來貢泰
定帝致和元年正月遣使獻方物文宗天歷二年正
月至順三年十一月俱遣使貢方物

臣等謹按元史外國傳太祖十一年契丹人金山
元帥陸格等領衆九萬餘竄入高麗國十二年九
月攻拔江東城據之是年帝遣哈齋濟達喇等領
兵征之國人洪大宣詣軍中降與哈齋濟等同攻
圍之高麗王名閔奉牛酒出迎王師且遣其樞密

院使趙冲共討滅陸格冲請歲輸貢賦達喇曰爾國道遠難於往來每歲可遣使十人來貢自後連七歲絕信使至太宗三年八月命薩喇達征其國迺有王噉遣其弟懷安王挺請和事則此云太祖十三年乃太宗三年之訛也又當定宗憲宗之世歲貢不入故自定宗二年至憲宗八年凡四命將征之拔其城十有四憲宗未噉遣其世子俱入朝世祖中統二年三月遣使入貢六月俱更名植三

年十月詔諭植籍編民出師旅輸糧餉助軍儲是
月遣使入貢四年自三月至於六月凡三遣使入
貢五年改元又遣使入貢自是終世祖三十一年
其國入貢者凡三十有六又自成宗元貞至仁宗
皇慶二年瞰傳其子植植傳其子矩矩傳其子諫
諫傳其子燾燾傳其弟嵩數十年間歲修職貢不
絕焉

憲宗七年九月禁回鶻獻珍玩

時所獻水精盆珍珠傘等物可值銀三萬餘錠帝曰
方今百姓疲弊所急者錢耳朕獨有此何為却之
音諤德齊以為言稍償其直且禁其勿復有所獻
八年二月安南遣使獻方物

至世祖中統二年九月至元二年七月四年九月十
一月七年十一月十年十月俱遣使來貢十六年七
月十七年十二月俱遣使貢馴象十八年閏八月遣
使貢方物十九年九月遣使進犀兕金銀器香藥等

物二十年八月以方物來獻二十一年閏五月遣使
貢玉杯金瓶珠條金領及白猿綠鳩幣帛等物七月
以方物來獻二十三年五月二十四年四月九月二
十六年四月閏十月二十七年正月二十八年九月
俱遣使貢方物成宗元貞元年三月二年五月俱遣
使獻方物大德二年九月聖誕節交趾貢方物十一
月又貢方物六年六月以馴象二及硃砂來獻八年
十月十年十月俱遣使貢方物仁宗皇慶二年四月

延祐四年六月五年正月俱遣使貢方物七年英宗
即位十月遣其臣貢方物至治二年正月十一月俱
遣使貢方物泰定帝泰定元年十月二年三月四年
十月十二月俱遣使貢方物致和元年五月安南國
及八洞蠻酋遣使獻方物文宗天歷元年九月至順
二年五月三年四月十年十二月十五年六月俱遣
使來貢十六年七月交趾貢馴象十七年正月六月
俱奉歲貢并方物

外國傳曰中統二年安南遣人詣闕獻書乞三年
一貢遂從其請三年九月復詔自中統四年始每
三年以蘇合油光香金銀硃砂沉香檀香犀角玳
瑁珍珠象手綿白磁蓋等物來貢至元三年十二
月遣使上表三通其一進獻方物六年十一月上
書陳情謂陛下須索巨象數頭此獸軀體甚大步
行甚遲不如上國之馬候於後貢之年當奉獻又
具表納貢七年十一月中書省移牒令以所索之

象與歲貢偕來又責前所貢藥物品味未佳十年
遣使來貢十四年十五年貢方物及馴象二十四
年九月遣使入貢二十六年四月遣使貢方物二
十七年遣使來貢三十年遣陪臣來貢又是年五
月成宗即位遣使上表進方物大德十一年武宗
即位下詔諭之屢遣使來貢至大四年八月遣使
奉表來朝自仁宗延祐初元以及英宗至治之末
疆場寧謐貢獻不絕泰定帝泰定元年遣陪臣來

貢文宗至順三年四月遣其臣來貢方物

臣等謹按元史紀傳所載土貢事每多大同小異
今具錄之以備參考

世祖中統二年六月勅平陽路安邑縣葡萄酒自今毋
貢

至成宗元貞二年三月罷太原平陽路釀進葡萄酒
其葡萄園民特為業者皆還之

至元元年正月東川都元帥楊大淵進花羅紅邊絹各

百五十匹優詔諭之

詔曰所貢幣帛已見忠勤鄉守邊陲宜加優恤今後
以此自給俟有旨乃進

八月禁勿以官物進獻

二年正月八東乞兒部牙西來朝貢銀鼠皮二千

四年正月百濟遣其臣梁浩來貢

七年十二月金齒驃國三部酋長阿匿福勒丁阿匿瓜

來內附獻馴象三馬十九匹

至二十五年十一月金齒遣使貢方物二十六年三月金齒人塞完以人戶來歸仍進象三十九年十二月木忽魯甸金齒土官入見貢方物三十一年成宗即位六月雲南金齒路進馴象三大德二年九月聖誕節金齒國貢方物武宗至大四年仁宗即位五月金齒諸國獻馴象

八年五月牢魚國來貢

十三年四月勅以碩達勒遼分地歲輸皮革自今並入

上都

九月勅常德府歲貢包茅

十六年六月雲南都元帥愛魯克尼雅斯拉鼎等軍還
獻馴象十二

至二十二年九月雲南貢方物三十一年成宗即位
十二月曲靖澂江普安等路夷官各以方物來貢大
德五年八月雲南武定路土官羣則獻方物七年閏
五月雲南行省平章伊蘇岱爾入朝以所獲軍中金

五百兩為獻帝曰是金卿効死所獲者賜鈔千錠泰
定帝泰定三年九月雲南行省諸路土官並奉方物
來獻致和元年三月雲南土官撒加布降奉方物來
獻文宗天歷元年九月雲南孟定路土官來貢方物
十月雲南銀羅甸土官哀贊等徹里路土官刁賽等
來貢方物十二月雲南土官普雙等及姚州知州高
明各來貢方物二年十一月雲南威楚路土官脫放
來朝貢至順元年二月雲南麓川等土官來貢方物

三月雲南木邦路土官渾都來貢方物二年二月雲南景東甸蠻官阿只弄遣子罕旺來朝獻馴象乞陞甸為景東軍民府阿只弄知府事罕旺為千戶常賦外歲增輸金五十兩銀七百兩從之五月雲南威楚路之蒲蠻猛吾來朝貢願入銀為歲賦順帝元統元年十月雲南僂羅土官渾鄧馬弄來貢方物二年正月雲南土酋姚安路高明來獻方物至元四年八月雲南老告土官八那遣姪那賽齋象馬來朝十五年

八月雲南死可伐等降令其子莽三以方物來貢十
六年正月雲南土官阿蘆降遣姪腮幹以方物來貢
是月占城馬八兒諸國遣使以珍物及象犀各一來
獻至十七年八月占城馬八兒國皆遣使奉表稱臣
貢寶物犀象十八年九月占城國來獻方物十九年
十一月馬八兒國遣使以金葉書及土物來貢二十
一年正月馬八兒國遣使貢珍珠異寶緃段八月占
城國王乞回唆都軍願以土物歲修職貢遣使奉表詣

闕獻三象二十一年十一月占城國奉表賀聖誕節獻
禮幣及象二十二二年九月真蠟占城貢樂工十人
及藥材鰐魚皮等物二十三年正月馬八兒國遣使
進銅盾九月馬八兒及須門那等凡十國各遣其子
弟上表來覲仍貢方物二十四年二月馬八兒貢方
物三月遣使進奇獸一類驟而巨毛黑白間錯名阿
塔必即二十六年十二月馬八兒進花驢二十八
年八月馬八兒遣使進花牛二水牛土彪各一武宗

至大四年仁宗即位十二月占城遣使奉表貢方物
皇慶元年十一月占城國進犀象延祐元年閏三月
馬八兒國王昔剌木丁遣其臣愛思丁貢方物英宗
至治二年正月占城遣使來貢方物三年七月占城
國王遣其弟保佑八剌遮奉表貢方物泰定帝泰定
四年五月占城貢方物七月占城獻馴象二致和元
年正月占城貢方物且言為交趾所侵詔諭解之文
宗至順二年二月占城遣其臣高暗都剌來朝貢三

年三月占城遣使奉金書表及方物來貢順帝至元二年五月占城遣使獻方物且言交趾過其貢道詔遣使宣諭交趾

臣等謹按外國傳至元十六年十二月遣使至占城諭其主入朝至十七年二月始遣使貢方物奉表降十九年以負固弗服遣兵征之二十年正月乃使人奉國王信物雜布二百匹大銀三錠小銀五十七錠碎銀一甕為質來歸款嗣後遷延不肯

出降二十一年三月官軍遂回四月又奉表歸款
是年命發兵假道交趾伐占城然亦不果行蓋與
紀所載有不同者若馬八兒國則自至元間奉表
稱藩二十三年海外諸國凡十曰馬八兒曰須門
那曰僧急里曰南無力紀作南馬里曰馬蘭丹曰那旺
曰丁呵兒曰來來曰急蘭亦得曰蘇木都剌皆遣
使貢方物自此以後事多不載

七月阿爾哈雅入覲獻金三千五百八十兩銀五萬三

千一百兩

胡粹中曰世祖天資仁厚宇量寬宏獨好利之心差勝耳得江南後即陳宋寶玉於殿廷又撿覈新舊錢穀置徵理司立規措所權茶酤賣及阿里海牙入朝受所獻金銀又受江浙行省平章蒙古岱獻真珠一百斤

事在二十一年正月

故令權奸若阿哈瑪特僧

格盧世榮皆以言利進蓋上有好者下必有甚焉者矣於是阿里瑪欲殺崔斌則誣以盜糧四十萬

僧格欲害郭孝楊居寬則奏其虧欠鈔六千餘錠
蒙古岱謀陷劉宣則言其阻壞錢糧終至元之世
江南三省盜起不止皆由於鈎考理算剝生民
蓋好利之弊一至於此當時阿喇卜丹坐盜鈔二
萬嘉木楊喇勒智發宋陵取金銀八千五百兩受
獻鈔十餘萬寶玉無算盧世榮盜官物金銀二萬
餘錠他物稱是苟上之人不欲曷至此哉

十二月八里灰貢海青

回回等所過供食羊非自殺者不食百姓苦之帝曰
彼吾奴也飲食敢不隨我朝乎詔禁之

十八年五月圖耽羅國今歲貢白紵

至二十八年十一月遣使貢東紵百匹成宗大德二
年五月以方物來貢

閏八月命播州每歲親貢方物

至二十七年二月播州安撫使楊漢英進雨氍毹十又
是時同進者駙馬鐵別赤進羅羅斯雨氍毹六十刀五

十弓二十五月叙州等處諸部蠻夷進雨氊八百仁
宗延祐五年十月播州南寧長官洛麼遣人以方物
來覲是後泰定帝泰定四年七月播州蠻謝烏窮來
獻方物

十九年九月招討使楊庭堅招撫海外南番皆遣使來
貢

先是十七年十一月翰林學士承旨和爾果斯等言
俱藍馬八閭婆交趾等國俱遣使進表乞答詔從之

至是年七月閩婆國貢金佛塔是月俱藍國主遣使
奉表進寶貨黑猿一蘇木達國相臣那里八合刺攤
赤因事在俱藍國聞詔代其主打古兒遣使奉表進
指環印花綺段及錦衾二十合寓俱藍國伊囉勒昆
主綽和爾薩勒達亦遣使奉表進七寶項牌一藥物
二瓶

臣等謹按外國傳海外諸番惟馬八兒與俱藍足
以網領諸國而俱藍又為馬八兒後障先是十六

年十二月遣廣東招討司達嚕噶齊楊廷璧招之
十七年三月附表以進言來歲遣使入貢至二十
三年諸國凡十皆來降

已見十六年
占城國條

與紀所載年

月小異

二十一年正月桑阿克達爾遣使進緬國所貢珍珠珊
瑚異綵及七寶束帶

二十六年閏十月緬國遣使來貢方物三十一年成
宗即位十月遣使貢馴象十元貞元年二月緬國來

獻舍利寶玩八月進馴象三二年十一月緬王遣其
子來貢方物大德四年四月遣使進白象七月緬人
以方物來朝五年六月遣使進馴象九十月遣使入
貢七年八月遣使獻馴象四武宗至大元年正月進
馴象六五月又進馴象六仁宗延祐二年六月緬國
王遣其子脫剌合等來貢方物六年七月緬國趙欽
撒以方物來覲泰定帝泰定元年十月緬國王子吾
者那等爭立歲貢不入命雲南行省諭之三年正月

緬國亂遣使乞師獻馴象方物文宗至順三年遣使
奉方物來朝貢

臣等謹按外國傳先是詔宗王桑阿克達爾等將
兵征緬二十年十一月破其江頭城至二十四年
緬始平乃定歲貢方物則此時所進未必即其所
貢也又是年四月本紀載雲南行省為破緬國江
頭城進童男女八十人并銀器幣帛則亦俘掠得
之用以進獻耳嗣是大德元年二月緬王遣使入

朝請歲輸銀二千五百兩帛千匹馴象二十糧萬石三年三月復自陳部民為金齒殺掠率皆貧乏以致上供金幣不能如期輸納乃止命間歲貢象四年四月遣使進白象七月奉方物入朝十月遣使來貢亦與本紀所載有異

九月海南貢白虎獅子孔雀

十一月福建行省遣使人八合魯思招降南巫里別里刺理倫大力等四國各遣其相奉表以方物來貢

十二月荆湖占城行省遣八番劉繼昌諭降龍昌寧龍延萬等赴關奉羊馬白氊來貢

二十二年九月勅自今貢物惟地所產非所產者毋輒上

二十三年十月馬法國進鞍勒氊甲

二十四年六月百官獻馬以給衛士

以職守不得從征乃顏故也

七月弘州匠官以犬兔毛製如西錦者以獻授匠官知

弘州

八月女人國貢海人

至二十六年閏十月羅斛女人二國遣使貢方物

二十五年五月烏瑪喇來獻璞玉

九月鬼國建都皆遣使來貢方物

二十六年四月置浙東江東江西湖廣福建木綿提舉

司責民歲輸木綿十萬匹

至二十八年五月罷江南六提舉司歲輸木綿

六月西番進黑豹

二十七年九月金竹府知府掃閭貢馬及雨氊

二十八年八月咀喃藩邦遣使進金書寶塔及黑獅子

番布藥物

十月羅斛國王遣使上表以金書字仍貢黃金象齒

丹頂鶴五色鸚鵡翠毛犀角篤耨龍腦等物是月中

書省言洞蠻請歲進馬五十匹雨氊五十被刀五十

握丹砂雌雄黃等物率二歲一上詔從之十一月新

添葛蠻安撫率洞官阿汾青貴來貢方物十二月八
番洞官吳金叔等以所部內附詣闕貢方物二十九
年二月金竹酋長騷驢貢馬羣各二十有七從其請
減所部貢馬降詔招諭之賜新附黑蠻衣襖遣回命
進所產硃砂雄黃之精善者無則止是月幹羅斯招
附桑州生苗羅甸國古州等峒酋長三十一詣闕貢
獻十一月提督溪錦州銅人等洞酋長楊秀朝等入
見進方物

二十九年閏六月罷福建歲造象齒幣帶

是月回回人和卓哈資售大珠却之

三十年二月回回瑪哈瑪迪沙等獻大珠邀價鈔數
萬錠帝曰珠何為當留是錢以賙貧者

三十年正月勅福建毋進鶻

二月却江淮行樞密院官不憐吉帶進鷹仍勅自今
禁戢軍官無從禽擾民違者論罪至成宗大德八年
四月詔諸王駙馬進捕鷹雞皆有定戶自今非鷹師

而乘傳冒進者罪之十年四月詔凡匿鷹犬者沒家
資之半笞三十來獻者給之以賞武宗至大二年正
月德呼特穆爾布哈進鷹犬命歲以幣帛千匹鈔千錠
與之

三十一年五月

時成宗
已即位

雲南部長邊習四川散毛洞主

單順等來貢方物

六月必察不里城敢木丁遣使來貢

是時趙天麟上策曰方今纂組綾綿金珠璧貝殊

方異物珍羞美饌以至俳優賤物亦已多矣彼斑
斕之獸粲錯之馬有之不足增光無之不足為歎
近年來重譯來呈望風並湊府無虛月史不絕書
若以帝王大體珍禽異獸不育於國不寶遠物則
遠人格真知言者也且異物蕩心其害一使外國
聞之以國家有嗜好其害二水陸轉運役人非細
其害三有三害而無一利伏望詔四遠之納款者
聽書檄奏聞而不獻物子弟入朝而不納賄則化

天下以德示天下以無欲將見西蕃東徼之主君
義幕靈州之酋長承恩來享慕道來王矣

成宗元貞元年六月詔遼陽省進海東青鶻

九月爪哇遣使來獻方物

至大德二年九月聖誕節又貢方物英宗至治三年
二月天壽節遣使來貢泰定帝泰定二年三月遣使
奉表及方物來朝貢三年二月遣使貢方物四年十
二月遣使獻金文豹白猴白鸚鵡各一文宗至順三

年三月遣其臣奉金書表及方物來朝貢順帝至正二十三年五月遣使淡濛加加殿進金表貢方物

臣等謹按外國傳祇書世祖至元二十九年三十年征瓜哇國事不載奉表入貢茲從本紀

二年正月回紇布爾罕獻獅豹藥物

五月罷四川馬湖進獨本葱

是月也伊克默色進紫檀

十一月答馬刺一本王遣其子進象十六

大德元年二月蒙陽甸酋長遣其弟獻方物且請歲貢銀千兩

是月減福建提舉司歲織段三千匹其所織者加文繡增其歲輸衲服二百其車渠帶工別立提舉司掌之六月罷亦奚不薛歲貢馬及氊衣

三年正月暹番沒刺由羅斛諸國各以方物來貢

五月海南速古臺速龍探奔奚里諸番以虎象及杪羅木舟來貢

五年二月永寧路總管瓊磋來朝獻馬三十餘匹

八月征緬萬戶曳刺福山等進馴象六

七年二月禁諸人非奉旨毋得以寶貨進獻

七月叛賊麻你降貢金五百兩童男女二百人却之

八年七月諸王哈贊自西域遣使來貢珍物

九年四月東川路蠻官阿葵以馬二百五十匹金二百

五十兩及方物來獻

十年三月崆古王遣使來貢

十月青山叛蠻紅犵獠等來附仍貢方物

十一年七月

時武宗已即位

使鄂勒哲偕奇爾台鄂諾往徵奇

爾濟蘇部達噶噶馬鷹鷄

武宗至大元年正月幽王徹伯爾進玉六百一十五斤
九月太尉托克托奏泉州大商哈濟特濟格進異木沈
檀可構宮室者勅江浙行省驛致之

是月泉州大商嗎哈丹達爾進珍異及寶帶西域馬

閏十一月罷江南進沙糖及遼陽省進雕豹

二年四月令自今遠方以奇獸異寶來者依驛遞其商人因有所獻者自備資力

中書省言江浙杭州驛半歲之間使人過者千二百餘有僧烏邈寶合鼎等進獅豹鴉鶻留二十有七日人畜食肉千三百餘斤因以此為請從之

九月占八國王遣其弟來貢白面象

四年五月

時仁宗已即位

罷鬼蠻來貢方物

六月諸王達爾瑪吉爾迪遣使進馴象

是月罷只合尺巴喇噶遜所造上供酒

仁宗皇慶元年二月西北諸王額森布哈遣使貢珠寶
皮幣馬駝

三月西北諸王額森布哈等遣使以橐駝方物入貢
二年二月西北諸王額森布哈進馬駝璞玉

八百媳婦來獻馴象二

九月其大小薩爾滿獻馴象及方物延祐二年十月
遣使貢馴象二至泰定帝泰定三年五月八百媳婦

蠻招南通遣其子招三聽奉方物來朝七月又遣使來獻馴象方物四年二月招南通來獻方物致和元年五月遣子哀招獻馴象文宗天歷元年十一月使者哀昭以方物來貢

延祐元年三月暹國王遣其臣愛耽入貢

至六年正月暹國遣使奉表來貢方物英宗至治三年正月暹國遣使來貢

五年五月順元等處軍民宣撫司阿晝以洞蠻酋黑冲

子子昌奉方物來覲

九月太平路總管率土官黃法扶何凱並以方物來貢

七年四月

時英宗已即位

却獻七寶帶

時有獻七寶帶者因近臣以進帝曰朕登大位不聞卿等薦賢而為人進帶是以利誘人也其還之七月
禁獻珍寶製袞冕

九月遣茂札木等使占城占臘龍牙門索馴象

十月酉陽土官丹世昌遣其子率大小石隄洞蠻入貢

英宗至治二年二月諸王奇卜遣使進文豹又遣使進海東青鶻

十月押濟思國遣使來貢方物

三年正月八番洞蠻酋長遣使來貢

征東未吉地兀者戶以貂鼠水獺海狗皮來獻詔存恤三歲

二月天壽節賓丹等國遣使來貢

四月故羅羅斯宣慰使迷古妻漂末權領司事遣其子

娑住那來獻方物

泰定帝泰定元年正月八番生蠻韋光正等及楊黃五種人以戶來附請歲輸布二千五百匹置長官司以撫之

二月諸王徹伯爾博囉各遣使來貢

至三月諸王保賽音遣使朝貢四月諸王保賽音遣使來貢諸王徹伯爾等遣其宗親特穆爾布哈等奉馴豹西馬來朝貢二年正月諸王徹伯爾遣使貢方

物九月諸王活濟遣使貢金浮圖又諸王牙即貢馬十
二月諸王保賽音遣使貢珠三年正月諸王保賽音
遣使獻西馬五月藩王徹伯爾遣使來獻豹七月諸
王保賽音獻駝馬八月保賽音又遣使獻玉及獨峰
駝十一月又遣使來獻虎及馬是月諸王諤斯伯獻
文豹四年三月諸王偉斯巴勒保賽音等以文豹西馬
佩刀珠寶等物來獻保賽音遣使獻文豹獅子七月
周王和寶拉及諸王揭珠濟達等來貢十月諸王圖

魯卜穆爾哈爾滿等獻玉及葡萄酒十二月諸王索
羅遣使貢硃砂致和元年二月諸王伊濟遣使來貢
方物

高昌王伊都呼帖特穆爾布哈遣使進葡萄酒

三月月直延民真只海阿答罕來獻大珠

六月廣西左右兩江黃勝許岑世興乞遣其子弟朝貢
許之

至九月岑世興遣其弟興元來朝貢四年十二月右

江諸寨土官岑世忠等獻方物致和元年三月雲南
安隆寨土官岑世忠與其兄世興相攻籍其民戶來
附歲輸布三千匹請立宣撫司以總之不允

二年五月龍牙門蠻遣奉表貢方物

七月大小車里蠻來獻馴象思州洞蠻揚銀千等來
獻方物三年三月八番巖霞洞蠻來降願歲輸布二
千五百匹設蠻夷官鎮撫之至至順二年五月八番
西蠻官阿路馬奉方物入貢三年二月八番苗蠻駱

度來貢方物順帝至正六年三月八番龍宜來進馬
五月罷造福建歲供蔗餉

八月西番土官撒加布來獻方物

四年七月八兒忽部晃忽來獻方物

八月勅應獵者捕禽獸以進

時奉元路治中單鵠言令民採捕珍禽異獸不便請
罷之故有是詔

九月阿察赤的斤獻水綿大行帳

湖廣土官宋王保來獻方物

致和元年三月雅濟國遣使獻方物

文宗天歷元年十月以河南江西湖廣入貢駕鵝太頻
令減其數以省驛傳

十一月雲南威楚路土官肌放失等九十九寨土官必
也姑等各以方物來貢

至二年二月廣西思明路軍民總管黃克順來貢方
物雲南行省蒙通蒙箕甸土官阿三木開南土官哀

放八百媳婦金齒九十九洞銀沙羅甸咸來貢方物
九月思明州土官黃宗永遣其子來貢虎豹方物至
順元年八月忠州土官黃祖顯遣其子宗忠來朝獻
方物十月烏蒙路土官阿朝歸順遣其通事阿累等
貢方物

二年四月占臘國來貢羅香木及象豹白猿
至順元年二月凡遇慶禮進表贊獻令如舊

中書省言舊制正旦天壽節內外諸司各有贊獻項

者罷之今江浙省臣言聖恩公溥覆幬無疆而臣等殊無補報請如舊制為宜從之

三月茂巴勒斯來貢葡萄酒

又西番哈喇和卓來貢葡萄酒諸王哈爾滿遣使來貢葡萄酒至二年正月哈爾滿又遣使來貢葡萄酒六月諸王綽斯本伊特甘布哈爾滿駙馬鄂勒哲特爾遣使來貢葡萄酒十二月西域諸王圖堅特穆爾遣使獻西馬及葡萄酒三年二月諸王達爾瑪實哩

哈爾滿各遣使來貢葡萄酒西馬金鴉鶻

七月舒蘇台蘇爾嘉額勒錦伯克等部獻人口牧畜命
酬其直

二年二月諸王伊蘇額布根貢犛牛

至十月雅克特穆爾取犛牛五千於西域來獻十一
月荆王伊蘇額布根獻犛牛四百

四月奇徹台以名園為獻命御史臺給贖罰鈔千錠酬
其直

六月懷德府洞蠻二十一洞因先什用等以方物來貢
八月西域諸王麻答遣使來朝貢

十月保賽音使者還西域詔酬其所貢藥物價直
是月布色台之孫伊嚕特穆爾瑪魯額森來獻實喇努
三年四月諸王保賽音遣使貢方物

七月保賽音遣使以七寶水晶等物來貢十月寧宗
己即位保賽音遣使來貢塔里牙八十八斤佩刀八
十

是月四川師壁散毛盤速出三洞蠻野王等二十三人來貢方物

又四川大盤洞謀者什用等十四人來貢方物至順帝元統二年正月大盤洞蠻謀各什用遣男謀者什用來貢方物

諸王不別居法郎遣使貢方物

至七月諸王達爾瑪實哩等遣使來貢虎豹北邊諸王月即別遣使來朝貢

順帝元統二年十月却天鵝之獻

至元二年十一月宗王伊遜特穆爾進西馬三匹

至至正十二年八月齊王寶勒們獻馬一萬五千匹
於京師十三年八月親王奇爾濟蘇特穆爾獻馬

至正二年七月拂郎國貢異馬長一丈三尺三寸高六
尺四寸身純黑後二蹄皆白

至十三年九月西歪刺歹僧格實哩獻馬一百匹又
札你馴之地獻大薩哈連察察爾密實勒刀弓鎖子

甲及青白西馬各二匹

福州路貢物

錦荔支二十萬顆 錦圓眼二十萬顆 柑二千二百顆

橙三千顆

俱閩侯官
懷安縣貢 魴魚皮一百二十張 福清州
侯官懷安

長樂羅源
五縣貢

沙魚皮一百五張

福青州
連江羅源五縣貢

繡

段一百匹 衲襖三百領 刺白繫腰

泉州路貢物

砂哩別金櫻煎及金櫻子一十石

福寧州貢物

沙魚皮一十五張御茶

連寧貢

臣等謹按王圻續通考謂各省所貢惟閩可考聊錄於左

欽定續文獻通考卷二十八